



DE STUDENTE- GUIDE



ACEL
de Studentenverteider

Op der sich no enger

AARBECHT

oder engem

STAGE?



Job Portal

...






Christelle May
Vizepresidentin
Informatioun



Polina Bashlay
Comitésmember



Catherine Nilles
Comitésmember

Léif zukünfteg an aktuell Studenten,

D'ACEL ass houfreg, hir zweet Versioun vum **De Studenteguide** ze presentéieren.

An dëser Broschür fannt dir eng Rei Informatiounen, déi iech während ärem Studium kënnen nützelech sinn. D'Zil vun dësem Guide ass et nämlech, iech ären Alldag als Student ze erliichteren an iech sou vill Froe wéi méiglech zu de Besonneschkeeten an néng verschidde Länner ze beäntweren. Vun der Wunnengssich bis zum Schluss vun ärem Studium steet de Studenteguide iech zur Säit.

Dir wësst net genau, wéi dat a Frankräich mat der Taxe d'habitation gereegelt ass oder wat et mat der GIS an Éisträich op sech huet? Wat musst dir fir är Wunnengssich wëssen a wéi kënnt dir äert Studium finanzéieren? Dës a vill aner Froe kritt dir an dësem Guide beäntwert.

D'ACEL seet all hire Membercerclen an deene verschiddenen Institutiounen, déi dës Editioun erméiglecht hunn, villmools Merci.

Mir hoffen, dass dës Guide iech während ärer Studienzäit weiderhëlleft a wënschen iech vill Erfolleg a virum allem vill Spaass an dëser ganz besonnescher Zäit.

Impressum



ACEL
de Studentevertrieider

Editeur	Association des Cercles d'Étudiants Luxembourgeois (ACEL) 2, avenue de l'Université L-4365 Esch-sur-Alzette Tél.: 20 60 84 84 E-mail: contact@acel.lu Internetsite: www.acel.lu
Tirage	6000 Exemplairen
Koordinatioun	Christelle May, Polina Bashlay, Catherine Nilles
Realisatioun	Anja Kohl, Lara Schneider
Fotoen	www.shutterstock.com www.pixabay.com
Editoun	2020

4 **Wat ass d'ACEL?**

8 **Studéieren...**

...zu Lëtzebuerg	10
...an Däitschland	14
...a Frankräich	19
...an der Belsch	24
...an der Schwäiz	26
...an Éisträich	31
...a Groussbritannien	34
...an Holland	38
...an den USA	41

46 **Wunnengssich**

50 **Finanzéierung vum Studium**

56 **Krankeversécherung am Ausland**

Wat ass d'ACEL?

D'Association des Cercles d'Étudiants Luxembourgeois (ACEL) ass e Comité, deen aus Lëtzebuurger Studente besteet, déi als Zil hunn, d'Schüler an d'Studenten aus dem Land iwwert déi verschidde Studiegäng ze informéieren, se reegelméisseg zesummenzebréngen a se duerch e permanente Kontakt mat deene verschiddene Ministèreen ze representéieren.

D'ACEL ass 1984 gegrënnt ginn an huet sech säitdeem als Missioun gesat, datt d'Studente besser gehéiert solle ginn. D'Associatioun ass zanterhier net méi aus dem Lëtzebuurger Studentemilieu ewechzedden.

Haut vertritt d'ACEL iwwert 40 Studentecerclen, déi duerch d'ganz Welt verdeelt sinn. Et fënnt ee se an Däitschland, a Frankräich, an der Belsch, zu Lëtzebuerg, an Éisträich, an der Schwäiz, a Groussbritannien an Holland an an den USA. Dës Cerclen empfänken d'Lëtzebuurger Studente während hirer Studienzäit an hirer Studentestad a ginn de Studenten d'Méiglechkeet, u flotten Eventer deelzehuelen.

Dernieft ginn et nach déi fachspezifesch Cerclen. Dozou gehéieren d'Medezins-, d'Ekonomies-, d'Droits-, d'Psychologies-, d'Archivistik/Bibliothekär-, d'Ingenieurs-, d'Kommunikatiouns- an d'BTS-Studenten.

Dës grouss Unzuel vu Cerclë mécht d'ACEL zum gréissten a wichtegste Studentevertrieder zu Lëtzebuerg.


WAT ASS DER ACEL HIR AUFGAB?

MIR REGROUPÉIEREN

Ee vun den ACEL hiren dräi Haaptziler ass et, d'Studenten aus deene verschidde Stied zesummenzebréngen. Dofir organiséiert d'ACEL alljoers verschidden Evenementer. Ee vun deene gréissten Eventer ass „**De Studentebal**“, deem alljoers am Juli stattfënnt. Mat sengem eenzegaartege Konzept bréngt en an engem Owend déi verschidde Kulturen an Traditiounen aus deene verschiddene Studentestied zesummen.

E weidert Event ass den „**Tournoi de Noël**“, deem alljoers am Dezember stattfënnt an deene verschiddene Studentecerclen d'Méiglechkeet gëtt, während zwee Deeg am Basket, am Volleyball an am Fussball géinteneen unzetrieden.

Och d'**Réunion Européenne des Étudiants Luxembourgeois** (REEL), déi alljoers ronn 150 Lëtzeburger Studenten an enger europäescher Studentestad zesummebréngt, ass e wichtegt Evenement, dat d'Studente vereent.



MIR INFORMÉIEREN

Der ACEL ass et wichtig, dass d'Schüler an d'Studenten iwwert hir Méiglechkeeten nom Lycée, während dem Studium esou wéi och no de Studien informéiert ginn.

Fir dëst Zil ze erreechen, bréngt d'ACEL alljoers verschidde Publikatiounen eraus. Am „**Guide du Futur Étudiant**“ fannen d'Schüler all déi néideg Informatiounen iwwert déi verschidde Studentestied, wéi och iwwert déi verschidde Formatiounen, déi an deenen eenzele Länner ugebuede ginn.

„**De Studenteguide**“ riicht sech un d'Studente während hirer ganzer Studienzäit. Nieft deenen wichtigsten Informatiounen ronderëm d'Studenteliewen, wei de Finanzement vum Studium oder hëllefriich Tipps zur Wunnengssich, informéiert dës Broschür och iwwer Besonneschkeeten a verschidde Länner.

De „**Guide du Futur Diplômé**“ gëtt de Studenten eng ganz Rei Informatiounen mat op de Wee, déi hinnen de Start an d'Berufswelt erlichtere sollen.



Niewent dësen dräi Publikatiounen geet d'ACEL och regelméisseg an déi verschidde Lycéeën uechtert Land, fir d'Schüler iwwert d'Studien ze informéieren.

Fir de Schüler bei hirer Entscheedung iwwer zukünfteg Studien ze hëllef, organiséiert d'ACEL alljoers de „**Student fir 1 Dag**“. Hei hunn d'Schüler d'Méiglechkeet, mat engem Bus an hir zukünfteg Studentestad ze fueren a sech op der Plaz vun de Lëtzebuerger Studenten d'Stad, d'Uni an aner Raimlechkeeten weisen ze loossen. D'Schüler kommen esou a Kontakt mat de Lëtzebuerger Studenten a kënnen sech all hir Froen iwwert d'Studenteliewe beäntwere loossen.

D'ACEL an hir Membercerclé sinn och alljoers op der „**Foire de l'Étudiant**“ vertrueden, déi am November stattfénnt, fir den zukünftege Studenten esou vill wéi méiglech nützlech Informatiounen mat op de Wee ze ginn an hinnen all hir Froen, wat d'Studéieren ugeet, ze beäntwerten.



MIR REPRESENTÉIEREN

Nieft dem Regroupement an der Informatioun, vertritt d'ACEL d'Studente virun den Autoritéiten a verdeedegt hir Rechter. An dësem Kontext steet d'ACEL a reegelméissegem Dialog mat de verantwortleche Ministèren, ënner anerem dem Ministère fir Héichschoulbildung a Fuerschung, wéi och dem Aarbechtsministère.

D'ACEL ass awer net nëmmen national aktiv, mee hëlleft och de Studenten am Ausland bei Problemer mat den Autoritéiten.


D'ACEL ass ideologesch a politesch neutral, dat heescht, dass si keng bestëmmt parteipolitesch Meinung vertritt. Dat ass extrem wichteg, well d'ACEL dem Usprouch, all d'Studenten ze representéieren, wëll gerecht ginn.



» KONTAKT ACEL

www.acel.lu // contact@acel.lu //  ACEL-De Studentevertrieeder

 ACEL-De Studentevertrieeder //  @acelluxembourg



STUDÉIEREN...

Ob s du Student zu Lëtzebuerg oder am Ausland bass, hei sinn nätzlech Informatiounen fir dech!

ERASMUS

All Student huet am Kader vu sengem Studium d'Recht, 6 bis 12 Méint op enger Partner-Uni ze studéieren. Dëst nennt een en Auslandssemester. Organiséiert gëtt dëst Semester vum Programm Erasmus, den dech och dobäi ënnerstëtzt. Den Erasmus verlaangt eng gewëssen Organisatioun. D'Demarchen, déi s du maache muss, fir fortzegoen, sinn dës:

1. Mat Zäiten däin Dossier erareeche.
2. D'Lëscht vun den Unien duerchkucken a kontrolléieren, wéi vill Plaze se ubidden.
3. Kucken, wéi ee Semester s du fort kanns a sécherstellen, dass dëst mam Uniskalenner iwwereneestëmmt.
4. Dech iwwer d'Sproochkenntnisser, déi verlaangt ginn, informéieren (deemno wéi, ass hei e Sproochentest néideg).
5. Eng Krankeversécherung hunn (normalerweis geet deng Carte européenne d'assurance maladie duer).
6. Dir iwwerleeën, wéi s de dat Ganzt finanzéiers (op der Uni.lu huet een deelweis eng Bourse zegutt).
7. Kucken, dass Coursen ugebuede ginn, déi s de beleë muss.

Wann s du an d'Ausland studéiere gees, hues du, während deem Zäitpunkt wou s du am Ausland studéiers, d'Recht op d'Bourse de Mobilité vum Cedies.



Wanns du een Austausch an der Schwäiz maache wëlls, da muss du net iwwer den Erasmus-Programm, mee iwwer de Swiss-European Mobility Program fueren. D'Konditiounen sinn awer déi selwecht wéi fir den Erasmus.

Folgend Informatiounen bezéie sech op den Erasmus op der Uni.lu (se kënnen an deenen anere Länner variéieren):

Op der Uni.lu ass een Auslandssemester bis zum Ofschluss vum Bachelor obligatoresch. D'Bachelorstudente kënnen meeschtens am 3., 4. oder 5. Semesteren Erasmus maachen. Dofir muss een awer mindestens 15 ECTS-Punkten am 1. Semester gepackt hunn.

D'Masterstudente kënnen nëmmen am 3. Semester an den Erasmus goen. Heifir muss ee säin Erasmus-Projet erareeche, deen dann evaluéiert gëtt.

Fir d'Studente fënnt eng Informatiounsveranstaltung am Ufank vum Semester statt (Enn Februar). Am Mäerz mécht een dann dräi Choixen, fir unzeginn, wuer een am léifsten hi wéilt. Dono kritt een e Formular per Mail geschéckt, deen een ausfëlle muss. De Studiendirekter verdeelt dann déi fräi Plazen op Basis vun de Punkten,

déi een huet (am Abrëll).

Wann den Dossier da vun der Uni, op där ee studéiert, accordéiert gouf, muss ee sech op där Uni umellen, op déi een hi wëll. Et muss ee säin Dossier selwer un d'Uni schécken. E Learning agreement gëtt ausgefëllt (30 ECTS-Punkte minimum). Dëse muss vum Studiendirekter accordéiert ginn. Et kann een deen éischte Mount vum Erasmus dëse Learning agreement änneren, wann et néideg ass. Dëse muss och erëm vun deenen zwou Unien accordéiert ginn.


Wunnen

D'Uni këmmert sech net ëm d'Wunnengssich. Du muss dech also selwer ëm eng Schlofplaz an deem Land, wou s du däin Erasmus méchs, këmmere. Oft hunn déi Unien awer selwer Wunnengen, déi se Erasmusstudenten zur Verfügung stellen. Well och hei d'Unzuel limitéiert ass, muss du fréi genuch u sinn, fir esou eng Plaz ze kréien. Heifir mells du dech am beschten direkt bei der Uni selwer.

Méi Informatiounen zum Erasmus-Programm vun der Uni.lu fënns du hei:

https://wwwfr.uni.lu/etudiants/mobilite/outgoing_etudiants_de_l_uni_lu/erasmus_etudes





GRATIS ËFFENTLECHEN TRANSPORT

Säit dem 1. Mäerz 2020 ass den ëffentlechen Transport fir jiddereen zu Lëtzebuerg gratis.

STEIEREN VUM STUDENTENJOB ZRéckfroen

Als Student kann een déi Steieren, déi een am Kader vun engem temporären Aarbechtskontrakt op säi Salaire bezuelt huet, ënner verschidde Konditiounen zréckfroen.

Et handelt sech hei ëm folgend Konditiounen:

- Den Employeur iwwerhëlt d'Retenue forfaitaire
- Et huet een net méi ewéi 18 Deeg um Stéck geschafft
- Et huet een netto net méi wéi 14 Euro d'Stonn kritt

Dës Demande kann een am Joer N+1 erareeche, bei der Regularisatioun (Modell 100) oder per Joresofrechnung (Modell 163).

Dës Formularer fënns du ënner:

https://impotsdirects.public.lu/fr/formulaires/pers_physiques.html



Dëst ass de Fall, wann de Revenu, deem ee kritt huet, méi niddereg ewéi de Minimum vital ass oder wann en deem entsprécht.

Méi Informatiounen fënns du ënner folgendem Link:

<https://impotsdirects.public.lu/fr.html>





**EGAL A WAT FIR ENGER STAAT
DASS DU STUDÉIERS, MIR SINN DO.**

Do, wann Dir eis braucht.

[f cmcm_luxembourg](#) [@cmcm_lu](#) [CMCM Luxembourg](#) [cmcm_lu](#)

CMCM

ÄR GESONDHEITSMUTUELLE
ZANTER 1956

Déi meescht Lëtzebuerger Studente studéieren an eisem Nopeschland Däitschland. Ob s du no un der Lëtzebuerger Grenz oder méi wäit fort wëlls studéiere goen, dës Informatiounen kënnen dir während dengem Studium nützlich sinn!

FEINSTAUBPLAKETTE (ËMWELTPLAQUETTE)

Fir d'Loftqualitéit ze verbessern, ginn ëmmer méi Stied op de Wee vun enger Ëmweltplakette. An Däitschland ass et déi sougenannte „Feinstaubplakette“. Dës kanns du bei all TÜV kafen (6 Euro) oder beim ACL bestellen (10 Euro resp. 7,50 Euro fir Memberen). Beim TÜV kritt ee se direkt op der Plaz ausgestellt. Beim ACL dauert et bis zu 10 Schaffdeeg, bis ee se huet.

Jee nom Auto senger Schuedstoffklass kritt een eng vun dräi Plaketten (eng gréng, eng giel oder eng rout) ausgestellt, mat där een da mat sengem Auto an déi jeeweileg Stad kann erafueren oder eben net. Wéi eng Plakette ee brauch a wéi eng Stied ënner dës Ëmweltregelung falen, fënns du op folgendem Internetsite:

<https://www.umwelt-plakette.de>



Du kanns dech och beim ACL iwwer déi verschidde Plaketten informéieren an dës och direkt do bestellen:



ACL
54, route de Longwy
L-8080 Bertrange
Tel.: +352 45 00 45-1
www.acl.lu

KFZ

D'KFZ-Steiergesetz an Däitschland verflucht Leit, déi an Däitschland ugemellt sinn oder déi hiren éischte Wunnsätz an Däitschland hunn, hiren Auto an Däitschland unzemellen an dee Moment och Steieren drop ze bezuelen.

A leschter Zäit goufe mir awer ëmmer méi oft ugeschriwwen, fir gesot ze kréien, dass och d'Lëtzebuerger Studenten opgefuerdert ginn, dës Steuer ze bezuelen. D'ACEL versicht natierlech am Sënn vum Student eng Léisung ze fannen. Momentan musse mir eis awer nach mat verschidden Acteure gesinn an eis weider an d'Thema eraschaffen.

Fir momentan mol d'Situatioun beschméiglech ze iwwerbrécken, géife mir dir uroden, folgend Schrëtt anzehalen, falls du e Bréif solls kréien:

1. Schrëtt:

Op de Bréif vun der Police an/oder dem „Hauptzollamt“ äntweren. Op eisem Internetsite fënns du d'Virlog fir de Bréif, deem s du just nach mat dengem Donnéeën ausfülle muss:

<https://acel.lu/wp-content/uploads/2019/01/KFZ-Formulaire.pdf>



2. Schrëtt:

Un dëse Bréif muss du dann nach folgend Dokumenter unhänken:

- E Certificat de résidence vu Lëtzebuerg
- Eng Kopie vun der groer Kaart
- Eng Kopie vun der Assurance
- Eng Kopie vun der Vignette fiscale
- Deng Umeldungsbescheinigung vun der Uni

3. Schrëtt:

Alles zesummen (wa méiglech perséinlech) bei der Police, respektiv beim „Hauptzollamt“ ofginn.

4. Schrëtt:

Op d'Äntwert waarden an eis eng Kopie vum Bréif a vun denger Äntwert zoukommeloossen. Dëst erméiglecht et eis, an deem Dossier weiderzeschaffen an no enger Solutioun ze sichen.

5. Schrëtt:

Dono besteet d'Obligatioun, säin Auto an Däitschland unzemellen. Hei gëtt et eng europäesch Direktiv, déi d'Studente vun dëser Obligatioun entbënn.

Et ass awer leider esou, dass Däitschland dës Direktiv net ratifizéiert huet a se aus deem Grond net an Däitschland applizéiert gëtt. Dem aktuelle Stand no muss also all Student, dee méi ewéi 12 Méint an Däitschland wunnt, säin Auto och do umellen. Dës Dauer gëtt ab deem Zäitpunkt gerechent, wou ee sech op der däitscher Gemeng ugemellt huet.

Mir siche weider no enger Léisung fir dës Problem an halen dech natierlech op www.acel.lu um Lafenden.

RUNDFUNKBEITRAG

An Däitschland gëtt et den sougenannten „Rundfunkbeitrag“. Dës Käschte setze sech souwuel aus Radio- wéi och Televisiounsfräisen zesummen. Wann s du d'Sozialbourse vum Cedies kriss, kanns du dech dovun befreie loossen. Dofir brauchst du e „Befreiungsantrag“ vum Rundfunkbeitrag. De Cedies leet dëst Dokument direkt bei de gielen Ziedel, deen deng Bourse confirméiert, dobäi. Wann dat net de Fall ass, kanns du d'Dokument per E-Mail ufroen iwwer d'Adress info@cedies.public.lu. An der E-Mail muss Folgendes stoen: däin Numm, deng Matricule a fir wéi ee Joer de Certificat soll sinn. Dëst Dokument musst du just erausdrécken an net ausfüllen. Du fënns d'Dokument och enner:

<https://www.verbraucherzentrale-niedersachsen.de/sites/default/files/medien/141/dokumente/Antrag%20auf%20Befreiung%20der%20Rundfunkbeitragspflicht.pdf>



Zousätzlech kanns du nach dëse Bréif ausfüllen a bei deng Demande dobäileeën:

<https://acel.lu/wp-content/uploads/2020/06/breif-rundfunkbeitrag.pdf>



Duerch dëse Bréif ass kloergestallt, dass de Cedies déi Agence ass, déi zu Lëtzebuerg fir d'Bourse zoustänneg ass an och op wéi eng EU-Gesetzter ee sech fir d'Befreiung berëfft. Och gëtt op den Artikel aus dem Rundfunkbeitrag-Gesetz fir Befreiung als Härtefall verwisen. Wichtig ass och, dass du dës Demande am beschten als Recommandé verschécks, fir dass du och beweise kanns, dass du d'Dokumenten erageschéckt hues.

Mam Aschécke vum Rundfunkbeitrag-Ziedel, dem Cedies-Certificat an dem Bréif sollt et méiglech sinn, sech vum Rundfunkbeitrag befreien ze loossen. Et muss een awer wëssen, dass de Rundfunkbeitrag sech ëmmer op de ganze Stot bezitt an net just op eng eenzel Persoun. Wann s du also an enger WG wunns an d'Sozialbourse kriss, mee däi Matbewunner se net kritt, kanns du net vum Rundfunkbeitrag befreit ginn.

Du muss dës Befreiung all Semester ufroen, soss gëss du nees opgefuerdert, de Bäitrag ze bezuelen. No der éischter Befreiung soll et laut verschiddene Réckmeldung souguer méiglech sinn, dat Ganzt online auszuféieren. Heifir muss du nees wéi uewe beschriwwen den Ziedel beim CEDIES ufroen, dës scannen an da folgend Schrëtt duerchféieren:

• Op folgenden Site goen:

https://www.rundfunkbeitrag.de/buergerinnen_und_buerger/formulare/kontakt/index_ger.html





- Do op „eine Frage zu meinem Beitragskonto stellen“ klicken
- Deng perséinlech Donnéeën ausfüllen an d'Bäitragnummer net vergiessen
- Am Feld „Ihre Nachricht“ kuerz erklären, dass du hinne wéi d'lescht Semester déi néideg Dokumenter fir d'Befreiung heimat zoukomme léiss
- Am Feld „Datei anhängen“ de gescannte Formulaire vum CEDIES eroplueden an d'Ufro ofschécken


Et ass esouguer méiglech, sech réckwierkend vum Rundfunkbeitrag befreien ze loossen. Dat allerdéngs just fir en Zäitraum vun dräi Joer. Et wier wichteg fir eis, ze wëssen, ob dëst bei jidderengem klappt. Dofir géife mir eis iwwert eng kuerz Réckmeldung freeën, wann s du dech net online befreie loosse konnts. Du kanns eis op contact@acel.lu schreiwen

VERFLICHTENDEN HAAPTWUNNSËTZ

Laut dem däitsche Gesetz bass du als Student verflcht, däin „Erstwohnsitz“ an denger Studentestad unzemellen. Du muss awer drun denken, dass du dech net zu Lëtzebuerg ofmellen dierfs, well s du soss däin Urecht op d'Bourse an d'Krankeversicherung verléiers. Du hues also ab deem Moment zwee Hauptwunnsëtzer, wat gesetzlech kee Problem ass. Eventuell kriss du, nodeems du dech ugemellt hues Post vum Beitragsservice fir de Rundfunkbeitrag. Vun där Steuer kanns du dech awer befreie loossen, wann s du och d'Sozialbourse kriss (weider Informatiounen dozou fënns du ënner dem Punkt „Rundfunkbeitrag“).

WARMMIETE/KALTMIETE

Wien an Däitschland eng Wunneng lount, gëtt gezwongenermoosse mat de Begrëffer „Kaltmiete“ a „Warmmiete“ konfrontéiert.



Kaltmiete: Dëse Montant setzt sech nëmmen aus deene Käschten, déi ee fir d'Wunneng un de Proprietär bezuele muss, zesummen an hänkt souwuel vun der Gréisst vun der Wunneng, ewéi vum Quadratmeterpräis of.

Warmmiete: Dëse Montant setzt sech aus der „Kaltmiete“ an den Niewekäschten zesummen. Zu den Niewekäschten zielen d'Waasser, d'Heizung, Versécherungen, Fraise fir d'Offallentsuergung ewéi och méiglech Käschten, déi fir eng Botzfra ufalen, déi déi gemeinschaftlech Zonen am Appartementshaus botzt (Trapenhaus, Lift, etc). Oft ass et esou, dass du dech selwer ëm de Stroum, den Internet an en Telefon muss këmmen. Dës Käschte sinn also net an der „Warmmiete“ mat abegraff. Vu dass dëst also vu Fall zu Fall anescht ass, rode mir dir, éier s du de Kontrakt ënnerschreift, beim Proprietär nozefroen, wat an der „Warmmiete“ mat abegraff ass.

BEFREIUNG VUN DER KRANKEVERSÉCHERUNG

Oft froen d'Unien eng Umeldung bei enger däitscher Krankekeess. Dëst brauchst du awer als Lëtzebuerger Student net ze maachen, well s du eng europäesch Krankekeesskaart („Carte européenne d'assurance maladie“) besëtzt an dofir europawäit verséichert bass. Du muss dir just vun enger däitscher Krankeversécherung bescheinege loossen, dass du zu Lëtzebuerg verséichert bass. Heifir gees du mat denger Krankekeesskaart einfach an iergendeng Agence vun enger däitscher Krankekeess (zum Beispill d'AOK) a frees no engem Ziedel,

dee bestätegt, dass du befreit bass. Bei de meeschten Unie si sou Filialen an der Géigend, mee du kanns awer och kuerz iwwer d'Grenz fueren (z. B. op Tréier) falls du grad nach zu Lëtzebuerg bass. Dësen Ziedel kanns du da bei der Uni areecheen.

Wann s du engem Studentenjob nogees, kann et sinn, dass d'äin Employeur dech freet, fir eng däitsch Krankeversécherung nozeweisen. Sollt dëst d'Konditioun sinn, fir agestellt ze ginn, muss du an Däitschland eng Krankeversécherung hunn.

DÄITSCH BANKKONTO

Bei verschiddenen Telefons- an Internetubbidder kann ee just mat engem däitsche Kont seng Facturë bezuelen. Oft kann een och just mat engem däitsche Konto säi Loyer a seng aner Chargë bezuelen. An deene meeschte Fäll gëtt de Montant souguer automatesch vum Kont ofgebucht. Hei rode mir dir einfach, bei iergendenger däitscher Bank ee Kont opzemaachen. Dofir muss du deng Umeldungsbescheinegung mat op d'Bank huelen. Wichteg ass just, dass ëmmer genuch Geld um Konto ass, fir dass d'Zomme vun denge Rechnungen och all Mount kënnen ofgebucht ginn.





Ob s du niewent dem Eiffeltuerm oder beim Europaparlament studéiers, och a Frankräich ginn et Besonneschkeeten, déi s du an dengem Alldag als Student solls kennen. Lies dofir dës Informatiounen duerch!

VIGNETTE CRIT'AIR (ËMWELTPLAQUETTE)

Fir d'Loftqualitéit ze verbesseren, ginn ëmmer méi Stied op de Wee vun enger Ëmweltplaquette. A Frankräich heescht d'Ëmweltplaquette CRIT'Air. Se ass a bestëmmten Zone vu Frankräich obligatoresch. An deenen Zone kann de Verkéier zu bestëmmten Dageszäiten ageschränkt ginn. Du kanns d'Vignette online bestellen. D'Ausstellen dauert ongeféier 3 Wochen, de Präis ass 4,21 Euro. All weider Informatiounen fënns du ënnert www.certificat-air.gouv.fr, wou s du och deng CRIT'Air-Vignette bestelle kanns.

Du kanns dech och beim ACL iwwer déi verschidde Plaquetten informéieren.



ACL
54, route de Longwy
L-8080 Bertrange
Tel.: +352 45 00 45-1
www.acl.lu

PÉAGE

A Frankräich muss ee bezuelen, fir op der Autobunn kënnen ze fueren. Dëst mécht een am sougenannte Péage. Mat dësem Geld ginn d'Stroossen neigemaach an an der Rei gehalen.

Wann een duerch e Péage fiert, kann een dëse mat enger Visaskart bezuelen, wat relativ séier geet oder mat borem Geld, wat e bësse méi laang dauert. Wann ee sech beim Péage net onbedéngt wëll an d'Rei stellen, kann ee sech och en Télépéage-Badge ufroen. Mat deem kann een duerch déi Barrière fueren, déi extra fir den Télépéage reservéiert sinn. Fir d'Studenten ënnert 26 Joer ass de Badge dat éischt Joer gratis, d.h. dass een d'Frais-de-gestionen (1,70 Euro de Mount) an d'Mise en service (11 Euro) net bezuele muss. Et kritt een dann all Mount eng elektronesch Rechnung zougeschéckt, wou de Präis vun de Faarten duerch de Péage drop steet. Dëse Bip&Go kanns du ganz einfach beim ACL kafen:



ACL
54, route de Longwy
L-8080 Bertrange
Tel.: +352 45 00 45-1
www.acl.lu

Méi Informatiounen zum Péage kriss du beim ACL oder op folgendem Site:

https://www.aprr.fr/autoroute/tarif_autoroute.html



ËFFENTLECHEN TRANSPORT (TGV)

Fir net ëmmer mussen mam eegenen Auto an d'Studentestad ze fueren, kann een och den TGV huelen. Méttlerweil fiert den TGV vu Lëtzebuerg aus op Metz, Stroosbuerg, Lyon, Paräis, Montpellier, Lille, Rennes a Bordeaux. Billjeeë kann ee ganz einfach online op www.sncf.com kafen. Mir rodendir allerdéngs un, däi Billjee laang genuch am Viraus ze kafen, well do d'Präisser fir den TGV nach méi bëlleg sinn.

Et kann ee sech och bis 27 Joer eng „Carte jeune“ zouleeën, mat där ee vu Reduktiounen op den TGV-Billjeeë profitéiere kann. Dës kascht 49 Euro pro Joer an et muss ee se och ëmmer bei senger Rees virweise kënnen. Weider Informatiounen zur Carte jeune fënns du ënner:

<https://www.oui.sncf/train/carte-abonnement-train>





Avis d'impôts drop).

Déi néideg Virlag fënns du op eisem Site ënner:

<https://acel.lu/2017/10/27/6058/>



TAXE D'HABITATION

Wann s du a Frankräich wunns, kriss du Enn November déi sougenannten Taxe d'habitation ze bezuelen. Du muss awer fir den 1. Januar schonn an denger Wunneng gewunnt hunn, fir dann am November d'Tax gefrot ze ginn.

Beispill: Du kanns nëmmen eng Tax am November 2017 ze bezuele kréien, wann s du am Januar 2017 och an der Wunneng gewunnt hues. Wann s du awer elo am Abrëll N+1 an eng aner Wunneng plënners, kanns de awer nach ëmmer fir deng al Wunneng, an där s de am Joer N gewunnt hues, eng Tax gefrot ginn.

Opgepasst: Oft gëss du eréischt no dräi Joer opgefuerdert, ze bezuelen, mee da kriss du direkt zwou Rechnunge beieneen.

Befreiung vun der Taxe d'habitation:


Wann s du kee Revenu hues, kanns du dech zum Deel vun dëser Tax befreie loossen. Eng ganz Befreiung ass fir Studente vum franséische Gesetz net virgesinn. Fir dech zum Deel befreien ze loossen, muss du eng „Demande gracieuse“ beim Centre des Finances Publiques erareeche, dee fir deng Tax zoustänneg ass (dat steet um

Et ass wichteg, dass du den Delai respektéiers, fir de Montant vu denger Tax ze kontestéieren. Hei huet een Zäit bis den 31. Dezember vum nächste Kalennerjoer.

Du muss och oppassen, dass du deng Tax mat Zäite bezils, well s de sos relativ séier eng Majoratioun vun 10% vum Gesamtbetrag kriss. Dat ka souguer schonn zwee Deeg nom verpasste Bezueltermin de Fall sinn. Fir all eventuell Strofzënsen ze vermeiden, rode mir dir un, de komplette Betrag direkt ze bezuelen a gläichzäiteg d'Demande gracieuse ze maachen. Wann d'Reduktioun dann duerchgeet, kriss de deng Suen zeréck.

Leider kënnen mir awer net garantéieren, dass dat mat der Demande gracieuse och klappt. Mir roden dir awer op alle Fall un, déi Reduktioun unzefroen.

Bemierkung: En neit Gesetz reegelt d'Taxe d'habitation nei, a soll schrittweis 80% vun de Stéit vun der Tax befreien. Aktuell feelen awer nach Informatiounen, fir eng Schlussfolgerung zur Applikatioun vun dësem neie Gesetz ze zéien. D'ACEL hält dech ënner www.acel.lu um Lafenden.



CONTRIBUTION DE VIE ÉTUDIANTE ET DE CAMPUS (CVEC)

CVEC steet fir „Contribution de vie étudiante et de campus“ an ass e Betrag vun 91 Euro, deen d'Studenten, déi eng Formation initiale am Enseignement supérieur a Frankräich maachen, all Joer musse bezuelen. Dëse Betrag muss virun der Aschreiwung bezuelt ginn.

Dëse Betrag kritt een net vum Cedies rembourséiert. Méi Informatiounen fënns du um Site ënnert:

<https://cvec.etudiant.gouv.fr>



FINANZIELL HËLLEF VUN DER CAF

A Frankräich huet all Student d'Recht op eng staatlech finanziell Hëllef vun der CAF (Caisse d'allocations familiales). Dëse Montant läit ongeféier tëschent 80 an 200 Euro de Mount. D'Hëllef vun der CAF kanns du ganz einfach iwwer den entsprechenden Internetsite ufroen (www.caf.fr). Op dësem Site fënns du och Informatiounen zu deenen Dokumenter, déi s du brauchst, fir d'Hëllef unzefroen. Sät enger Reform ass dëse Montant vum Loyer vun der Wunneng ofhängeg.


FRANSÉISCHE BANKKONTO

Bei verschiddenen Televisiouns- an Internetubbider kann ee just mat engem franséische Konto seng Facturë bezuelen. Oft kann een och just mat engem franséische Konto säi Loyer a seng aner Chargë bezuelen. An deene meeschte Fäll gëtt de Montant souguer automatesch vum Konto ofgebucht.

Hei rode mir dir einfach, bei iergendenger franséischer Bank e Konto opzemaachen. Dofir muss du däi Contrat de bail mat op d'Bank huelen. Wichteg ass just, dass ëmmer genuch Geld um Konto ass, fir dass d'Zomme vun denge Rechnungen och all Mount kënnen ofgebucht ginn.

Studentekaart

+



= 30 €



Spezial Offer fir Studenten: 30 € Kredit op däi Flex Kont!

*Fir vun dëser Offer ze profitéieren, schéck eis eng Kopie vun denger
Studentekaart an deng Flex Clientsnummer op info@flex.lu*

De **Carsharing**
iwwerall
zu Lëtzebuerg



Flex Carsharing by **CFL**

Och an der Belsch ginn et eng Rei Saachen, déi s du als Student wësse muss. Mir hunn dir déi wichtegst Informatiounen zesummegefaasst, fir dir däi Liewen an der Belsch ze vereinfachen.

ZONE DE BASSES ÉMISSIONS (ËMWELTPLAQUETTE)

Fir d'Loftqualitéit ze verbesseren, ginn ëmmer méi Stied op de Wee vun enger Ëmweltplaquette. Dës huet als Zil, déi ëmweltfrëndlechste Autoen ze favoriséieren, a wann ee keng huet, kann et séier deier ginn.

An der Belsch war bis elo just Antwerpen a Bréissel concernéiert. Sait 2020 ass awer och zu Gent eng Ëmweltzon (LEZ) ageriicht ginn. All Autofuerer, deen an déi Zon erafuere wëll, muss sech registréieren loossen. All weider Informatiounen zu der sougenannter Low Emission Zone (LEZ) fënns du hei:

<https://www.acl.lu/de-de/news/mobilite-tourisme/zones-de-basses-emissions>



Beim ACL kanns du dech och iwwer déi verschidde Plaquetten informéieren:



ACL
54, route de Longwy
L-8080 Bertrange
Tel.: +352 45 00 45-1
www.acl.lu


SEUIL DE RÉUSSITE

Dat éischt Joer vum Bachelor besteet aus 60 ECTS-Punkten (de ganze Bachelor aus 180). Ab deem zweete Joer kann een da selwer wielen, wéi vill ECTS-Punkten een erreeche wëll. Fir sech kënnen an d'zweet Joer anzeschreiwen, muss ee mindestens 45 ECTS-Punkten, souwéi och (wann een der huet) seng Pre-Requise vum éischte Joer gepackt hunn.

Et kann ee sech ëmmer nëmme jeeweils fir maximal 75 ECTS-Punkten umellen. Wann ee méi wéi 15 ECTS-Punkten net gepackt huet, kann ee sech net am nächste Joer umellen. An all Fach muss een op mannst 10/20 hunn. An Fächer wou ee manner kritt, muss een en Noexamen schreiwen.

Mat 165/180 gepackten ECTS-Punkten aus dem Bachelor ass et méiglech,

e Master unzefänken. Et muss een awer dofir am selwechte Joer déi 15 ECTS-Punkten nohuelen, an dat geet och nëmme, wann een de Master op därselwechter Uni mécht. Falls een awer fir de Master d'Uni wiessele wëll, muss een all Cours mat op d'mannst 10/20 packen, dat heescht, et muss een déi 180 ECTS-Punkten direkt gepackt hunn.



D'Schwäiz ass fir vill Lëtzebuerger e beléift Studieland. Och hei hu mir dir déi wichtegst Informatiounen zesummegeacht, mat deenen s du méi einfach duerch däin Alldag kënns.

AUTOSVIGNETTE

Fir an der Schwäiz kënnen op der Autobunn oder den Nationalstroossen ze fueren, brauch een eng Vignette. Dës Vignette kascht 40 Schwäizer Frang (CHF), et kritt een se op der Grenz oder beim ACL ze kafen a se ass vum 01.12.N bis den 31.01.N+2 gëlteg (insgesamt 14 Méint laang).

<https://www.ch.ch/de/autobahnvignette>



Du kanns dech och beim ACL iwwer d'Schwäizer Vignette informéieren an dës och direkt do kafen:



ACL
54, route de Longwy
L-8080 Bertrange
Tel.: +352 45 00 45-1
www.acl.lu

ZOLL

Wann ee mat sengem Auto an d'Schwäiz wëll eran- oder erausfueren, muss ee sech beim Transport vu Liewensméttel, Déieren a Planzen u verschidde Virschrëften halen.

Bis op verschidden Ausname kënnen all déi Liewensméttel importéiert ginn, déi net als Déiereprodukter agestuuft sinn. Heibäi muss ee just d'Wuerewäertgrenz vun 300 Schwäizer Frang beuechten.



PRODUIT	MAX. QUANTITÉIT/ PERSON	ZOLL FIR ZOUSÄTZ- LECH QUANTITÉIT
Fleesch a Wurschten	1 Kilo	bis 10 kg: 17 CHF/kg méi wéi 10 kg: 23 CHF/kg
Botter oder Ram	1 Kilo	16 CHF pro kg/Liter
Fett, Ueleg a Margarine	5 Kilo	2 CHF pro kg/Liter
Alkoholescht Gedrénks bis zu 18% vol.	5 Liter (nëmme Persounen iwwer 17 Joer)	2 CHF pro Liter
Alkoholescht Gedrénks iwwer 18% vol.	1 Liter (nëmme Persounen iwwer 17 Joer)	15 CHF pro Liter
Gedrénks mat engem Alkoholgehalt bis zu 0,5% vol. gëllt net als alkoholescht Gedrénks.		
Zigaretten/Zigaren	250 Stéck (nëmme Persounen iwwer 17 Joer)	0,25 CHF pro Stéck
Aner Tubaksproduiten	250 Gramm (nëmme Persounen iwwer 17 Joer)	0,10 CHF pro Gramm

Eng einfach Method, fir d'Wuere korrekt ze verzollen, ass per App (www.quickzoll.ch). Ier een an d'Schwäiz areest, gëtt een d'Quantitéit vun all de Wuere un, déi een ze verzollen huet. D'App berechent dann, wéi vill een nach bezuele muss. D'Quantitéiten, déi erlaabt sinn, an d'Unzuel vun de Persounen déi mat engem reesen, ginn do mat betruecht. Doniewent gëtt et nach d'Méiglechkeet, d'Wuere op der Grenz selwer unzemellen.

Planzen:

Verschiede Planzen däerf een net mat an d'Schwäiz huelen. Eng Iwwersiicht fënns du ënner dësem Link: www.ezv.admin.ch.

Hausdéieren:

Hënn, Kazen a Frettercher däerfe mat an d'Schwäiz geholl ginn. Folgend Viraussetzunge mussen just erfüllt sinn:

- D'Déier brauch en offiziellen Impfpass
- D'Déier muss en Chip oder eng gëlteg Tätowéierung hunn
- D'Déier muss géint Tollwut geimpft sinn (tëscht der 1. Impfung an der Urees müssen 21 Deeg vergaange sinn)

Plënnere:

Wann s du fir d'éischt an d'Schwäiz plënners, däerfs du theoretesch dat mat iwwer d'Grenz huelen, wat dir och virdru gehéiert huet a wat s du an der Schwäiz fir ze wunne brauchst. An der Reegel muss alles, wat méi nei wéi ee Joer ass, verzollt ginn.

Douaneskontrolle gi bei der Arees mam Auto, mam Zuch, mam Bus a mam Fliger gemaach. Et ass och méiglech, dass een an der Schwäiz selwer ugehal a kontrolléiert gëtt.

AUTO AN DER SCHWÄIZ

Soubal een e Wunnsätz an der Schwäiz huet (et zielt den Datum vum Auslännerausweis), däerf een nach ee Joer laang mat sengem lëtzebuergesche Führerschäin an der Schwäiz fueren. No engem Joer ass de Führerschäin an der Schwäiz net méi gültig. Dann huet een zwou Méiglechkeeten:

1) Bewilligung zum Benutzen eines unverzollten Fahrzeuges

Dëst muss ee bei der Douane ufroen, an et kritt een et an der Reegel och geneemegt, wann een ugëtt, dass een op d'mannst zwee mol de Mount zrëck op Lëtzebuerg fiert. Dofir brauch ee folgend Saachen:

- E Pass/eng Carte d'identité
- D'Pabeiere vum Auto
- Den Auto muss op ee selwer ugemellt sinn (net op d'Elteren oder soss e Familljemember)
- E Certificat de scolarité
- En Auslännerausweis
- E Certificat de résidence vu Lëtzebuerg
- 25 Euro

Ass dëst bis gemaach, däerf een an der Schwäiz just nach mat sengem eegenen Auto fueren a soss dierf keen op dësem Auto fueren.

2) Ëmschreiwe vum Lëtzebuurger Führerschäin an e Schwäizer Führerschäin

Et kann ee säi Lëtzebuurger Führerschäin an e Schwäizer Führerschäin ëmschreiwe loossen. Jee no Kanton, kann een dat nach bis zu fënnef Joer nom Areesen an d'Schwäiz maachen. Et muss een dofir en Aentest bei engem Aendokter/Optiker an der Schwäiz maachen a säi Führerschäi beim „Strassenverkehrsamt“ ofginn. Dono kritt een de Schwäizer Führerschäin heem geschéckt. De Lëtzebuurger Führerschäin gëtt weider op Lëtzebuerg geleet.

Weider Informatiounen, fir de Führerschäin ëmschreiwen ze loossen, fënns du um Site vum „Strassenverkehrsamt“ ënner dem Thema Führerausweis.

<https://strassenverkehrsamt.ch>



Et ass méiglech, dass een nach zousätzlech Fuersécherheetstraininge muss maachen (ähnlech wéi zu Colmer-Bierg), mee dat ass am Moment net eenheetlech gereegelt. Wichtig ass, dass ee mat engem Schwäizer Führerschäin innerhalb vun der Schwäiz just nach därerf mat Autoe fueren, déi an der Schwäiz immatrikuléiert sinn (wann z. B. d'Eltere mat engem Auto, deen zu Lëtzebuerg immatrikuléiert ass, op Besuch kommen, därerf een net dorop fueren!). Fir säin Auto an der Schwäiz ze immatrikuléieren, muss een deen importéieren, an zwar andeems een eng TVA vu 7,7% um Akafspräis oder dem aktuelle Maartwäert bezilt. Et muss een dann och Steieren an eng Assurance an der Schwäiz bezuelen.

D'Schwäizer verstinn hei kee Spaass. Wann een no engem Joer mat sengem lëtzebuergesche Führerschäin duerch d'Schwäiz fiert, gëtt dëst ugesinn, wéi wann een kee Permis hätt. Des Weidere muss een och eng héich Geldstrof bezuelen, wann een net mam richtigen Auto ënnerwee ass an een erwëscht gëtt.



ÖFFENTLECHEN TRANSPORT

D'Schwäizer Zuchnetz ass extrem effizient, esou dass ee vill Plaze mam Zuch erreeche kann. Allerdéngs sinn d'Zuchbilljeeë relativ deier, esou dass mir dir roden, dir de sougenannten „Halbtax“-Pass zouzeleeën. Dëse kascht 185 CHF (Stand Juni 2020) d'Joer an erlaabt et dir, all Zuchbilljee zum hallwe Präis ze kafen.

Eng Alternativ wier de „Seven25 Pass“, deen 39 CHF de Mount kascht, a mat deem een tëschent 19:00 a 5:00 Auer ouni weidere Billjee den Zuch huele kann.

PERMIS DE SÉJOUR/ AUSLÄNNERAUSWEIS

All auslännesche Student muss ee Permis de séjour (B-Schäin) besëtzen. Dëse kascht tëscht 60 an 100 CHF d'Joer. Fir esou ee Permis de séjour ausgestallt ze kréien, muss ee sech beim zoustännege Service de la population vu sengem Wunnuert mellen a folgend Dokumenter mathuelen:

- E Certificat de scolarité
- Zwou Passfotoen
- E gëltege Pass oder eng Carte d'identité

SCHWÄIZER FRANG (CHF)


An der Schwäiz gëtt a Schwäizer Frang bezuelt. Dës Währung kanns du dir ganz einfach op all Lëtzebuurger Bank besueren. Du muss hei just drun denken, d'Suen 2-3 Deeg am Viraus ze bestellen, fir sécher ze sinn, dass du se zur Zäit kriss.

Et kann een awer och mat senger lëtzebuergescher Bancomatskaart Suen an der Schwäiz ophiewen an och mat der Visas- oder Bancomatskaart an de Geschäfte bezuelen.

Wann s du an engem Geschäft mat denger Kaart bezils, këns du am beschten ewech, wann s du a Schwäizer Frang bezils (du kanns dat um Kaartenapparat auswielen).

Méi Informatiounen zum aktuelle Cours de change fënns du ënner :

<https://www.bcee.eu/cours/change>





Obwuel Éisträich net grad ëm den Eck läit, fanne vill Lëtzebuerger Studenten de Wee bis dohin. D'Informatiounen, déi s du onbedéngt wësse muss, wann s du an Éisträich studéiers, fënns du hei!

AUTOSVIGNETTE

An Éisträich ass ee verpflichtet, eng Vignette ze kafen, fir kënnen iwwer déi éisträichesche Autobunn ze fueren. Hei kritt een dräi verschidde Vignetten:

- Eng Vignette fir zéng Deeg: 9,40 Euro
- Eng Vignette fir zwee Méint: 27,40 Euro
- Eng Vignette fir ee Joer: 91,10 Euro

D'Vignette kritt een op der Grenz oder beim ACL:



ACL
54, route de Longwy
L-8080 Bertrange
Tel.: +352 45 00 45-1
www.acl.lu

GIS

An Éisträich ginn et déi sougenannten „Rundfunkgebühren“ (GIS). Dës Käschte setze sech aus Radio- an Televisiounstaxen zesummen. De Betrag vun dësen Taxe variéiert vu Bundesland zu Bundesland. Aktuell si just déi éisträichesche Studenten, déi eng Studiebäihëllef an Éisträich kréien, vun dëser Tax befreit.

D'Taxeflicht fänkt den éischten Dag vum Mount un, wou eng Televisioun oder e Radio an der Wunneng opgestallt ginn ass. Normalerweis ass et esou, dass d'GIS un der Hausdier schellt a freet, ob s du eng Televisioun oder e Radio hues.

De Moment probéiert d'ACEL ze erreechen, dass ee sech als Lëtzebuerger Student vun dësen Taxe befreie kann, wann een d'Sozialbourse vum Cedies kritt (esou wéi mir dëst beim Rundfunkbeitrag an Däitschland (fréier GEZ genannt) erreeche konnten). No éischter positiver Resultater schaffe mir aktuell nach mat weideren Testkandidaten, fir eng Befreiung ze erreechen.

All Neiegkeeten, wat dëst Thema ugeet, wäerte mir op www.acel.lu verëffentlechen. Bei Froe kanns du dech zu all Moment per Mail (contact@acel.lu) oder per Facebook bei eis mellen.

MELDEFLICHT

Laut Gesetz besteet an Éisträich eng Meldeflicht. Wann ee méi wéi dräi Méint an Éisträich wunnt, muss ee sech also um Gemengenamt oder um Bezierksamt (fir Wien) umelle goen. Dëst muss an Zäit vu véier Méint no der Urees gemaach ginn. Dofir brauchst du deng Carte d'identité, deng Aschreiwung vun der Uni, souwéi och den ausgefëllten Umeldungsformular, deen s du ënner folgendem Link fënns:

https://www.oesterreich.gv.at/themen/dokumente_und_recht/an_abmeldung_des_wohnsitzes/Seite.1180200.html



Op dëser Internetsäit fënns du och nach wieder Informatiounen zu der Umeldung an Éisträich.



ACL - MIR GARANTÉIEREN ÄR MOBILITÉIT



**I'm a
New Driver**

↓
**Elo ënner
acl.lu/Newdriver
umellen**

Hutt dir viru kuerzem äre Führerschäi gepackt ?

Gléckwonsch, mir schenken iech eng ACL Europa-Memberschaft!

All Persoun déi nach keen ACL Member ass, onofhängeg vum Alter, déi an deene lëschten 12 Méint hire Führerschäi gepackt huet, kritt dat éischt Joer eng gratis ACL Europa-Memberschaft.



www.acl.lu

Du studéiers e bësse méi wäit ewech vun doheem an hues nach déi eng oder aner Fro zum Liewen op der brittescher Insel? Hei fënns du nützlech Informatiounen ronderëm d'ä Studenteliewen an England a Schottland. Lies dës Informatiounen zum Brexit, dem Hall of Residence an dem Master of Arts duerch!

KEEP CALM AND BREXIT ON

Bis ewell huet de Brexit déi Lëtzebuergesch Studenten am Vereenegte Kinnekräich net weider betraff.

Den 31. Januar 2020 ass d'UK aus der Europäescher Unioun ausgetrueden. Bis den 31. Dezember 2020 befënnt sech d'UK an enger Transitounsphas. An där Phas wäerten nach méi konkret Mesurë geholl ginn. Wéi eng Wierkung dës op d'Lëtzebuurger Studenten huet, ass nach net gewosst an hei heescht et, Gedold hunn. Bis den 31. Dezember 2020 kann een awer bis op Weideres nach mat enger Carte d'identité an d'Vereenegt Kinnekräich areesen. No dësem Datum kann et sinn, dass d'Carte d'identité net méi duergeet. Fir op Nummer sécher ze goen, hëls du am beschten d'ä Reepass mat.

Falls du guer kee Pass solls besëtzen an ëmmer just mat der Carte d'identité geflu bass, kanns du nach séier e Pass zu Lëtzebuerg ufroen. Wann s du an der nächster Zäit net méi op Lëtzebuerg solls kommen, da kanns du och direkt op der Ambassade zu London e Pass ufroen:

27 Wilton Crescent - LONDON SW1X 8SD
Tel.: (+44-20) 7235 6961 // londres.amb@mae.etat.lu

Fir weider Froen a Saache Brexit huet de Staat iwwer MyGuichet en FAQ ageriicht :

<https://guichet.public.lu/fr/support/faq-brexit.html>



Falls du nach méi spezifesch Froe solls hunn, recommandéiere mir dir, eng Mail op folgend E-Mail-Adress ze schécken: brexit@mesr.etat.lu.

Mir halen dech op eisem Site (www.acel.lu) iwwer déi nei Entwécklungen a Saache Brexit um Lafenden.

BREXIT A SCHOTTLAND

A Schottland ass et esou, dass d'SAAS (Students Awards Agency Scotland) d'Aschreiwungsfraisen op der Uni vun denge véier 'Undergraduate'-Jore ganz fir dech iwwerhëlt. Dës muss du och net zréckbezuelen. D'SAAS iwwerhëlt och d'Aschreiwungsfraise vun de Lëtzebuerger Studenten, déi am September 2020 mat hirem Studium a Schottland ufänken. Ob d'Aschreiwungsfraisen och nach am September 2021 iwwerholl ginn, ass nach ongewëss.

Bleif och hei um neiste Stand a kuck op der Internetsäit eran:

<https://www.saas.gov.uk/need-to-know/brexit>



UREESEN

Am einfachsten a séierste kënns de mam Fliger an England oder Schottland. Zanter Abrëll 2019 gëtt et en Direkt-Vol an déi schottesch Haaptstad Edinburgh. Fir an aner Stied a Schottland ze reesen, kanns du entweder den Zuch huelen, oder soss Flig vum Findel aus buchen. Hei muss du dann awer zum Beispill zu Amsterdam, London oder Paräis ëmsteigen.

HALL OF RESIDENCE

A Groussbritannien hunn déi meescht Universitëiten hir eege Wunnheemer fir Studenten. Meeschtens sinn dat miwweléiert Wunnenge mat enger Gemeinschaftskichen, enger Toilette, engem Buedzëmmer an eventuell engem Gemeinschaftsraum. Dat nennt een en „Hall of Residence“.

Jee no Wunnheem huet een eng komplett Verfleegung, eng hallef Verfleegung oder guer keng Verfleegung. A verschiddene Wunnheemer sinn d'Geschlechter getrennt. Et ginn der awer och, wou se gemëscht sinn. Oft gi Porte-ouvertes organiséiert, fir dass ee sech e Bild vum Wunnheem ka maachen.

An dese Wunnheemer ass et meeschtens sou, dass een no sengem éischten Unisjoer an eng aner Wunneng plënnere muss. A verschidde Fäll kann een och méi wéi ee Joer am Wunnheem bleiwen, wa genuch Plaz ass.

Oft ass et esou, dass een eng Kautioun hannerleeë muss, fir kënnen am Wunnheem ze wunnen. D'Käschte fir d'Heizung, de Stroum an d'Waasser sinn normalerweis am Präis mat abegraff. Studente mussen déi sougenannt „Council Tax“ net bezuelen, egal, ob se an engem Studentewunnheem wunnen oder privat eng Wunneng lounen. An dëse Residenzen ass et oft esou, dass ee pro Wäsch (Trockner), déi ee mécht, bezuele muss (3£ pro Wäsch).

D'Studentewunnheemer befanne sech meeschtens no beim Unis-Campus, sou dass een net muss mat deieren Transportkäschte rechnen, fir op d'Uni ze kommen.

E weidere Virdeel vun engem Studentewunnheem oder enger Wunneng, déi vun der Uni geréiert gëtt, ass, dass een och alles online verwalte kann. Bei Privatwunnenge muss een oft, awer net ëmmer, op der Plaz sinn, fir d'Modalitéiten ze klären. Ausserdeem gëtt bei Privatwunnege meeschtens e sougenannten „Guarantor“ verlaangt – eng Persoun déi a Groussbritannien wunnt, déi dofir biergt, dass de Loyer bezuelt gëtt. Falls ee keng esou eng Persoun kennt, muss ee meeschtens e puer Méint Loyer am Virus bezuelen.

Méi Informatiounen fënns du ënner folgende Links:


<https://www.mystudenthalls.com>



<https://www.southampton.ac.uk/uni-life/accommodation/halls.page>



<https://www.uky.edu/housing/residence-halls>



MASTER OF ARTS

A Schottland ass et esou, dass wann ee véier Joer op enger Universitéit studéiert huet an de sougenannten „Undergraduate Master“ gemaach huet, dësen zu Lëtzebuerg net als Master unerkannt gëtt an och net der klassescher Master-Formatioun entsprécht.

„Master of Arts“ ass eng ierféierend Bezeichnung vum Bachelor a Schottland. Dat heescht am Kloertext, dass dësen „Undergraduate Master“ zu Lëtzebuerg net als Master, mee just als Bachelor unerkannt gëtt, och wann den Undergraduate véier Joer dauert, also aacht Semester an ëmgerechent 240 ECTS wäert ass.

Wien duerno nach motivéiert ass, e „Postgraduate Master“ ze maachen, kann dëst an engem Kalennerjoer, dat aus dräi Semestere besteet, maachen.

Doniewent ass et och wichteg ze wëssen, dass e Bachelor net un der Unzuel vun de Jore gemooss gëtt, déi een op der Uni oder der Héichschoul mécht, mee un der Unzuel vun ECTS-Punkten, déi een a sengem Studium erreicht. Op ville schotteschen Unien ass et esou, dass net mam ECTS-System gefuer gëtt, mee mat engem eegene Punkte-System. D'Äquivalenz vun den ECTS zu dëse „Credits“ ass 1:2. Deemno géifen zum Beispill 30 ECTS 60 schottesche „Credits“ entsprechen.



Holland ass eng Studiendestinatioun, déi ëmmer méi beléift ass. Hei fënns du Informatiounen, déi fir e Studium an Holland wichteg ze wësse sinn!

TESTER ALS VIR AUSSETZUNG

Sproochnoweis (IELTS, TOEFL, asw.):

Fir an Holland studéieren ze kënnen, ass et wichteg, dass een e gudden Niveau am Engleschen huet. Dat gëllt souwuel am Mëndlechen ewéi och am Liesen an am Schrëftlechen. Fir dës Kenntnisser nozeweisen, gëtt op munchen Unie mol e Sproochentest gefrot. Meeschtens gëtt den IELTS- an den TOEFL-Test vun den hollänneschen Universitëten akzeptéiert. Et kënnen awer och aner Tester gefrot ginn, ewéi zum Beispill de Cambridge English Test. Am beschten informéiers du dech am Viraus bei der Uni vun denger Wiel, ob se esou en Test verlaangt a wann jo, wéi een néideg ass.

Méi Informatiounen zu deene verschiddenen Tester fënns du hei:

TOEFL TEST: <https://www.ets.org/fr/toefl/test-takers/>



IELTS TEST: <https://www.ielts.org>



CAMBRIDGE ENGLISH TEST:
<https://www.cambridgeenglish.org>



<http://www.inll.lu/certifications-nationales-et-internationales/certification-en-langue-anglaise/>



Aneren Noweis:

Deemno fir wéi ee Bachelor ee sech umellt, muss een aner Kenntnisser noweisen. Sou kann et zum Beispill sinn, dass ee fir e Bachelor of science e Mathétest maache muss. Dëst hänkt vun Uni zu Uni of. Informéier dech also fréi genuch bei der Uni vun denger Wiel.



UMELDUNG OP DER GEMENG

EU-Studente brauche keng extra Openthaltsgeneemegung an Holland unzufroen. E gültege Pass oder eng Carte d'identité geet duer. Wann s du dech méi wéi véier Méint an Holland ophäls, muss du dech awer an enger Basisregistréierungsdatebank („Basisregistratie Personen“ oder BPR) an der Gemeng, wou s du wunns, androe loossen. Dëst kanns du ganz einfach mat denger Carte d'identité oder dengem Pass maachen. Du kriss dann eng sougenannte „Bürgerservicenummer“, déi s du brauchst, fir administrativ Ugeleeënheeten an Holland duerchzeféieren.

Méi Informatiounen fënns du um Site vun der Gemeng, an där s du wunns oder ënner:

<http://www.burgerservicenummer.nl>



KRANKEVERSÉCHERUNG

Als Student brauch ee keng Krankenversécherung an Holland ofzeschléissen, och wann ee per Bréif dozou opgefuerdert gëtt. Et soll een déi zoustänneg Administratioun awer a Kenntnis setzen, dass ee vu Lëtzebuerg aus verséichert ass, soss muss een eventuell eng Strof bezuelen.

Falls een awer an Holland schafft, muss een eng hollännesch Krankenversécherung ofschléissen.

VËLO

An Holland ass et en absolute Must, sech mam Vëlo a senger Studentestad ze deplacéieren. Hei ass et awer och wichteg, sech e gutt Schlass zouzeleeën, fir dass ee säi Vëlo net vun Onéierleche geklaut kritt.





Wann s du méi wäit ewech studéiere wëlls goen, däi kulturellen Horizont wëlls erweideren an eng ganz nei Erausforderung wëlls erliewen, sinn d'USA déi perfekt Destinatioun fir dech.

TESTER ALS VIR AUSSETZUNG

Sproochnoweis:

Fir an den USA studéieren ze kënnen, muss een e gudden Niveau am Engleschen hunn, souwuel am Mëndlechen ewéi och am Liesen an am Schrëftlechen. Fir dëst nozeweisen, kann een op munchen Unien e Sproochentest gefrot ginn. Meeschtens gött den IELTS- an den TOEFL-Test vun den amerikaneschen Universitëiten akzeptéiert. Et kënnen awer och aner Tester vun den Universitëite gefrot ginn, ewéi zum Beispill de Cambridge English Test. Am beschten informéiers du dech hei am Viraus bei der Uni, ob si esou een Test verlaangen a wa jo, wéi een néideg ass.

Méi Informatiounen zu de Sproochentester fënns du hei:

https://www.internationalstudent.com/study_usa/application-process/standardized-tests/overview/



SAT/ACT Standardized tests:

Dës Tester gi vu villen, awer net allen, Unie gefuerdert a spillen eng grouss Roll bei der Héicht vum Scholarship (méi dozou op der nächster Säit), deen een eventuell ka kréien. Et muss ee laang am Viraus plangen, wéini een den Test schreift. Online fënnt een och gratis Preparatiounstester a Bicher, déi engem hëllefen, sech dorobber virzebereeden. Vu dass et net nëmme wichteg ass, den Test ze packen, mee och e gudde Score ze erreechen, ass et recommandéiert, sech gutt a laang genuch am Viraus op den Test virzebereeden.

Den SAT evaluéiert zu 50% deng Mathéskompetenzen an zu 50% deng englesch Sproochkenntnisser. Den ACT verdeelt seng Schwéierpunkten op Wëssenschaften, Mathé an Englesch.

Am beschte mécht een den Test méi wéi eng Kéier, fir dass ee genau weess, wat op een duerkënnt. Zu Lëtzebuerg kann een den Test op der International School of Luxembourg (ISL) schreiwen.

Méi Informatiounen dozou fënns du ënner:

<https://collegereadiness.collegeboard.org>

<https://www.act.org>



U.S. VISA

Fir kënnen an den USA ze studéieren, brauchst du en U.S. Visa („student visa“). Fir deen ze kréien, muss du fir d'éischt online de sougenannten „DS-160“-Formular ausfüllen. Wann s du alles aginn hues, muss du drun denken, d'Bestätegungssäit erauszedrénken.

Nodeems du däi VISA bezuelt hues, muss du e Rendez-vous op der amerikanescher Botschaft oder dem Konsulat ausmaachen, fir e Visa ze kréien. Dëst kann eng Zäitchen daueren, dofir rode mir dir, d'Demande fir de Visa sou fréi wéi méiglech ze maachen.

Fir deng Demande ze komplettéieren, brauchst du folgend Dokumenter:

- E gëltege Pass
- En ënnerschriften „Certificate of Eligibility for Nonimmigrant Student Status“ (I-20-Formular)
- D'Bestätegungssäit vum DS-160-Formular
- D'Bestätegung vum Rendez-vous mat der Botschaft oder dem Konsulat

Déi genau Virgoensweis ass och nach emol op folgendem Site erkläert:

http://www.ustraveldocs.com/de_de/de-niv-visaapply.asp



KRANKEVERSÉCHERUNG

D'Gesetz verlaangt, dass déi Leit, déi an den USA studéieren, eng Krankeversécherung hunn.

D'Käschte fir d'Gesondheetsdénsgschtleeschunge kënnen ganz anescht ausfale wéi zu Lëtzebuerg. Dofir rode mir dir, eng zousätzlech Krankeversécherung ofzeschléissen. Am beschte frees du do bei denger Zousatzversécherung zu Lëtzebuerg no, fir weider Informatiounen ze kréien.

Déi meescht Unie bidde fir hir international Studenten eng Krankeversécherung un. Dës bezilt een automatesch, ausser et kann een nowiesen, dass een eng zousätzlech Krankeversécherung huet. Am beschte frees du bei der Uni selwer no, wat se de Studenten ubitt.

SCHOLARSHIP

Et ass gewosst, dass d'USA net bëlleg sinn, fir ze studéieren. Eng Bourse kann do scho ganz nützlich sinn. Eng Bourse ass eng finanziell Hëllef, déi als Zil huet, d'Studenten ze fërderen. D'amerikanesch Universitëte bidden och internationale Studenten eng Rei Bourssen un. Wien eng Bourse an den USA kritt, hänkt ganz vun de Modalitéite vun der jeeweileger Bourse of. Et gëtt also keng generell Reegel. Fir verschidde Boursse muss een eng gewësse Punktzuel am TOEFL-Test kritt hunn oder eng gewësse Moyenne erreechen. Hei muss du dech also informéieren, wéi eng Bourse fir dech a Fro komme géif. Dës ka sech duerchaus als komplizéiert erweisen.



Am beschte frees du direkt bei der Uni no.

SUE BLOCKÉIEREN

Fir an den USA studéieren ze kënnen, muss du garantéiere kënnen, dass du genuch Suen hues, fir ze liewen an deng Studiekäschten ze bezuelen. Dës Zomm gëtt folgendermoosse gerechent:

Du muss dat ganz Schoulgeld („tuition“) fir ee Joer a genuch Suen hunn, fir ee Joer kënnen ze iwwerliewen. Wat d'Tuition ubelaangt, gëtt scho mat a Betruecht gezunn, ob s du e Scholarship vun der Uni krus (dës gëtt dann ofgerechent).

All Uni gesäit do eng aner Zomm vir, wat d'Liewenskäschten ubelaangt, well dat hänkt vun der Stad of, wou s de wunns (New York ass zum Beispill méi deier). Normalerweis stinn dës Montanten op der Uni hirer Internetsäit.

STUDENTENJOB

An den USA dierfs du, als internationale Student, niewent dem Studium schaffe goen, awer ausschliisslech op der Uni an nëmme wann s du am Besëtz vun engem F-1-Visa bass.

Dëst ass folgendermoosse reglementéiert:

- 20 Stonnen d'Woch niewent de Coursen op der Uni
- Vollzäit an deene Perioden, wou ee keng Coursen op der Uni huet

Fir wieder Informatiounen kanns du och beim Beroder fir auslännesch Studenten op denger Uni mellen.

DOLLAR

An den USA gëtt mat Dollar bezuelt. Dës Währung kanns du dir ganz einfach op all Lëtzebuerger Bank besuergen. Du muss hei just drun denken, d'Suen 2-3 Deeg am Viraus ze bestellen, fir sécher ze sinn, dass du se zur Zäit kriss. Denk drun, dass du an den USA just mat enger Kreditkaart (Visa, Mastercard, asw.) an net mat denger Debitskaart (V PAY, Maestro asw.) an de Geschäfte bezuele kanns.

Mir roden dir, en amerikanesche Kont opzemaachen. Dëst kanns du bei all belibeger Bank an den USA maachen. Dofir brauchst du e gëltege Pass an eng Adress an den USA op där s du wunns. Falls weider Dokumenter gebraucht ginn, kriss du dat vun der jeeweileger Bank matgedeelt.


Méi Informatiounen zum aktuelle Cours de change fënns du ënner:

<https://www.bcee.eu/cours/change>

INTERNATIONALE FÜHRERSCHÄIN

Wann s du an den USA studéiers an do mam Auto fuere wëlls, brauchst du en internationale Führerschäin (däi lëtzebuergesche Führerschäi geet net duer).

Dëse kanns du beim ACL ausgestallt kréien. Dofir brauchst du folgend Dokumenter: e gëltege Führerschäin ausgehännegt vun engem Memberland vun der EU, en aktuelle Certificat de résidence vun denger Gemeng (deen net méi al wéi dräi Méint däerf sinn) an eng aktuell Passfoto vun dir. De Führerschäi kascht 12 Euro fir ACL-Memberen (Net-Membere bezuele 17 Euro) an ass maximal dräi Joer gëlteg. Zousätzlech zum internationale Führerschäi muss du och ëmmer däi lëtzebuergesche Führerschäin dobäi hunn.





Non respect de vos droits ? L'Union Luxembourgeoise des Consommateurs vous vient en aide

ULC nouvelle asbl

www.ulc.lu

**Pour toute demande de renseignements,
veuillez nous contacter s.v.p. par
téléphone - 496022-1 ou courriel - info@ulc.lu**

Heures d'ouverture des bureaux à Howald

de 8h00 à 12h00 et de 13h00 à 17h00
(l'après-midi uniquement sur rdv)

Permanences les lundis, mercredis et
vendredis de 12h00 à 13h00

Consultations par des avocats et conseillers fiscaux
sur rendez-vous uniquement

Consultations hebdomadaires par des conseillers de l'ULC à

- Esch/Lallange, complexe « Omnisport »
Bd Hubert Clément
Mardi de 14h00 à 16h00
- Ettelbruck, Maison sociale
40, avenue Salentiny
Jeudi de 14h00 à 16h00
- CSL Bonnevoie
2-4, rue Pierre Hentges
Mardi de 09h00 à 13h00
Jeudi de 13h00 à 17h00



SCAN ME

Scannez le QR-Code pour visiter
notre site Internet.



Union Luxembourgeoise des Consommateurs

55, rue des Bruyères L-1274 Howald

Téléphone: 49 60 22 - 1 Téléfax : 49 49 57

E-mail : info@ulc.lu www.ulc.lu

www.facebook.com/UnionLuxembourgeoisedesConsommateurs



Wann s du méi wäit ewech vu Lëtzebuerg studéiers, brauchst du eng Wunneng. Du hues d'Méiglechkeet, an e Studentewunnheem ze goen oder en Appartement oder e Studio ze lounen. Heibäi ginn et eng Rei Saachen, déi s du dofir wësse solls!

WÉI FËNNT EEN AM BESCHTEN ENG WUNNENG?

Et gi verschidde Méiglechkeeten, eng Wunneng ze fannen. Hautdesdaags geet dëst am beschten iwwer Internetsäiten oder iwwer Facebook, wou een eng Rei Gruppe vu Lëtzebuerger Studenten am Ausland fënnt, déi engem bei der Wunnengssich weiderhëllef kënnen. Vill Studente maachen an dës Facebookgruppen op hir Wunneng, déi fräi gëtt, opmierksam. Oft ass et also esou, dass verschidde Wunnenge vu Lëtzebuerger un aner Lëtzebuerger weiderverlount ginn. Natierlech besteet och d'Méiglechkeet, sech direkt bei Immobilienagencen ze mellen.

WAT MUSS ECH FIR D'WUNNENGSSICH WËSSEN?

Wann s du méi genau wëlls wëssen, wéi s du an denger Studiestad eng Wunneng kanns fannen, da kuck dir eise Guide du Futur Étudiant un. Dësen ass de verschiddene Stied no ënnerdeelt a gëtt dir déi verschidde Méiglechkeete fir d'Wunnengssich un. Du fënns en ënner www.acel.lu/gfe.

WAT ASS AM LOYER MAT ABEGRAFF?

Wann s du d'Präisser vun de Wunnenge vergläiche wëlls, dann denk drun, ze berücksichtegen, wat alles am Loyer mat abegraff ass. Oft mengt een, eng Wunneng wär méi bëlleg, mä da stellt sech eraus, dass et sech dobäi awer ëm e Präis ouni Niewekäschten (wéi Waasser, Stroum, Liftfrais, etc.) handelt. Fro also onbedéngt beim Proprietär, respektiv bei der Agence no, wat alles am Präis mat abegraff ass.

Oft ass et esou, dass de Stroum net am Loyer mat abegraff ass. Du kriss also vum Stroumbedreiwer eng extra Rechnung heemgeschéckt, déi s du da bezuele muss. Dëst ass just eng Virschreiwung an ass soumat net dat, wat s du tatsächlech verbraucht hues. Eemol d'Joer kriss du dann eng Ofrechnung, wou s du entweder nobezuele muss (wann s du méi verbraucht hues) oder Suen

zréckkriss (wann s du manner verbraucht hues). Och d'Internet- an d'Televisiounskäschte sinn an deene meeschte Fäll net am Loyer mat abegraff. Du muss dir also en Internet-/Televisiounsubbidder eraussichen a mat deem e Kontrakt ofschléissen.

WÉI ENG BEGRËFFER MUSS ECH KENNEN?

Wann s du da bis eng Wunneng fonnt hues, kommen eng Rei Begrëffer op dech zou.

Bierschaft:

Verschiede Proprietäre verlaangen eng sougenannte Bierschaft, well een als Student nach kee fest Akommes huet. Heibäi handelt et sech ëm eng Persoun, déi garantéiert, dass de Loyer fir d'Wunneng bezuelt gëtt. Falls du däi Loyer also net bezils, muss déi Persoun, déi fir dech biergt, dësen iwwerhuelen. Ween dës Persoun ass, gëtt meeschtens am Kontrakt festgehalten. Bei Studenten handelt et sech meeschtens ëm d'Elteren. D'Bierger mussen de Kontrakt dann och mat ënnerschreiw.

Kautioun:

E wichtege Begrëff, deen s du bei denger Wunnengssich kenneléiere wäerts, ass d'Kautioun. Wann s du eng Wunneng louns, verlaangt de Proprietär eng Kautioun. Et handelt sech ëm eng Zomm Suen (de Montant muss am Kontrakt festgehalen sinn), déi s du un de Proprietär bezuele muss. Dës Suen dierf de Proprietär awer net ausginn, mee déi ginn op d'Säit geluecht. Entweder iwwerweis du dem Proprietär selwer d'Kautioun oder d'Sue ginn op engem Bankkont blockéiert (garantie bancaire locative). Ob elo dat eent oder anert zoutreëft, hänkt vu Fall zu Fall of.

Falls du däi Loyer net bezils oder eppes an der Wunneng futti méchs, gëtt dëst vun denger Kautioun ofgehal. Wann alles an der Rei ass, kriss du deng Kautioun zeréck, wann s du erëm aus der Wunneng erausplënners.

Provisioun/Frais-d'agencen:

Bei Wunnengen, déi iwwer eng Immobilienagence vermëttelt ginn, muss ee meeschtens eng Provisioun (bzw. Frais-d'agencen) bezuelen. Dës Sue kritt een net zeréck, mee se déngen dozou, d'Agence fir hir Déngschtleeschungen ze bezuelen. Wichtig ass, dass d'Provisioun eréischt bei erfollegräicher Vermëttlung ze bezuelen ass. D'Wunnengsbesichtigunge sinn ëmmer gratis: Du muss d'Agence eréischt bezuelen, wann s du e Kontrakt ofgeschloss hues.

Wunnengsiwwergab/Etat des lieux:

Wann s du eng Wunneng louns, kënns du och mam Begrëff „Etat des lieux“ oder „Wohnungsübergabe“ a Kontakt. Heibäi handelt et sech ëm Besichtigungen, déi s du nach emol maache muss, éier s du deng Schlëssle kriss. Hei gëtt en Tour duerch d'Wunneng gemaach a sech alles ugekuckt. Et gëtt am Kontrakt (oder an engem extraen Dokument) notéiert, wann iergendeppes net funktionéiert (de Schäffchen, e Luuchteschalter, e Krunn, etc.) oder wann iergendwou eng Téitsch oder e Fleck an der Mauer oder am Buedem ass.

Denk drun, hei alles gutt ze kontrolléieren, net dass du dono dofir opkomme muss, wann s du erëm erausplënners. Denk och drun, dass alles, wat am ënnerschiwwene Kontrakt mat der Hand bäigefüügt gëtt, nach emol ënnerschiwwen muss ginn (hei geet eng Paraph duer). Am beschten ass och, wann s du vun allem Fotoe méchs, fir op Nummer sécher ze goen.

Zum Schluss vun dengem Kontrakt, also wann s du aus der Wunneng erausplënners, gees du nach emol mam Proprietär (oder enger Persoun vun der Agence) duerch d'Wunneng. Hei gëtt da gekuckt, ob an der Wunneng alles an der Rei ass. Falls iergendeppes net méi funktionéiert oder futti ass, dierf de Proprietär de Reparatiounspräis vun der Kautioun, déi s du bezuelt hues, ofrechnen.

WÉI KRÉIEN ECH DANN ELO MENG SAACHEN A MENG NEI WUNNENG?

Wann s du an deng Studiestad plënners, wëlls du sécherlech eng Rei Saache vun doheem mathuelen. Eventuell hues du jo och schonn e puer Miwwelen, déi s du mat an deng nei Wunneng huele wëlls. Schnell ass do den Auto net méi grouss genuch an et muss ee puer Mol de Wee an d'Unisstad fueren. Dëst ass alles anescht wéi praktesch, zemools wann een net grad ëm den Eck studéiert. Och wann ee keen Auto zur Verfügung huet, stellt sech d'Plënnere als extrem komplizéiert eraus.



Interessant ass et dofir beim ACL Clubmobil (Automobil Club) en Auto oder eng Camionnette ze lounen. Hei sinn eng Rei Autoskategorie souwéi och zwou verschiddene Gréisste vu Camionnetten (11,50 oder 15 m³) ze kréien. Als ACL-Member kann een hei vun 3% Remise profitéieren. Reservéiere kann een den Auto oder d'Camionnette ënner www.clubmobil.lu. Fir weider Informatiounen kanns du dech beim ACL mellen:



ACL
54, route de Longwy
L-8080 Bertrange
Tel.: +352 45 00 45-1
www.acl.lu

Finanzéierung



Studéiere goen, sief et am Ausland oder zu Lëtzebuerg, ass mat Käschte verbonnen an dofir gräift de Lëtzebuerger Staat de Studenten ënnert d'Äerm. Zu Lëtzebuerg këmmert de Cedies (Centre de documentation et d'information sur l'enseignement supérieur) sech ëm d'Gestioun vun der finanzieller Hëllef, déi de Staat de Studenten ubitt. Du kanns e per Telefon oder E-Mail kontaktéieren oder einfach am Service, dee vu méindes bis freides op ass, laanschtgoen.

cedies

Cedies
20, montée de la Pétrusse
L-2327 Luxembourg
Internetsäit: www.cedies.lu
Tel.: (+352) 2478 – 88628
E-Mail: aide-fi@mesr.etat.lu

WÉI FINANZÉIEREN ECH MÄI STUDIUM?

WÉI VILL SUEN HUNN ECH ZEGUTT?

Déi finanziell Hëllef vum Staat besteet aus engem Deel „Bourse“ an dem Deel „Prêt“. D'Bourse ass deen Deel, deen een net zeréckbezuele muss. De Prêt muss een no sengem Studium zeréckbezuelen. Et ass jidderengem fräi iwwerlooss, ob een de Prêt huele wëll oder net.

Bourse

Basisbourse:

2.050 Euro pro Joer: All Student, deen op enger Universitéit oder Héichschoul ageschriwwen ass, huet heirobber en Urecht.

Mobilitéétsbourse:

2.510 Euro pro Joer: Kritt all Student, deen ausserhalb vu sengem Wunnsätzland studéiert an do Loyer bezilt.

Sozialbourse:

Maximal 3.894 Euro pro Joer: Jee nodeem, wéi héich dat besteierbart Akommes vun den Elteren oder besser gesot, dem Stot ass, an deem een ugemellt ass, kann ee bis zu 3.894 Euro Sozialbourse kréien. Deen Deel, deen een net kritt, kann een als Prêt ufroen.

Familljebourse:

512 Euro pro Joer: Kritt all Student, deen e Brudder oder eng Schwëster huet, deen oder déi am selwechte Stot ugemellt an och op enger Uni ageschriwwen ass. Dësen Deel vun der Bourse kritt een nëmmen am Summersemester ausbezuelt.

Studiefraisen:

Maximal 3.700 Euro pro Joer: D'Aschreiwungs- a Studiekäschte vun 100 Euro bis zu Maximal 3.700 Euro ginn zu jee 50% op d'Bourse an op de Prêt opgedeelt. Hei ginn allerdéngs 100 Euro fir Dossierskäschtchen ofgehalen.

Härtefall:

1.000 Euro pro Joer: Sollt ee sech an enger „situation grave et exceptionnelle“ befannen, kann een eng zousätzlech finanziell Hëllef vun 1.000 Euro ufroen, dëst an engem Bréif un de „Ministère de l'Enseignement supérieur et de la Recherche“ adresséiert, an deem ee seng Situatioun erklärt. D'Sue ginn zu jee 50 % op d'Bourse an op de Prêt opgedeelt. Diskutéiert ginn d'Härtefall an der Commission consultative de l'aide financière, an där ënner anerem och d'ACEL vertrueden ass.

Prêt

6.500 Euro bis 10.394 Euro pro Joer: All Student ka 6.500 Euro Prêt ufroen. Deen Deel vun der Sozialbourse, deen een net kritt, kann een och als Prêt ufroen, deen domat op bis zu 10.394 Euro klamme kann. Dësen ass op maximal 2% Zënse gedeckelt an ass zwee Joer nom Studium an enger maximaler Zäitspann vun zéng Joer zréckzebezuelen.

Wichtig: Dës Montante sinn un den Index gekoppelt a kënnen jee nodeem variéieren.

WÉI MAACHEN ECH MENG DEMANDE?

Du hues zwou Méiglechkeeten:

- Online iwwer myguichet.lu
- Den Dossier erausdrécken, vervollständigen a per Post un de Cedies schécken oder en direkt beim Cedies am Service ofginn

Mir roden dir, se aus folgende Grënn online ze maachen:

1. Et muss een ab der zweeter Kéier vill manner Dokumenter mat eroplueden
2. D'Online-Demande ginn an der Reegel méi séier traitéiert. Dofir erkläre mir hei och just, wéi d'Online-Demande geet

Etapp 1: Aloggen

Fir d'éischt muss du dech op www.myguichet.lu aloggen. Wann s du nach kee Kont hues, muss du dech hei nei umellen. Dofir brauchst du deng Matricule an ee vun de véier LuxTrust-Certificaten: d'Carte d'identité, d'Smartcard, de Signing Stick oder den Token. Wichtig: Du muss däin eegene Certificat hunn, dee vun dengem Eltere geet net! Wann s du keen hues, kanns du dir een op www.luxtrust.lu bestellen.

Etapp 2: Dossier auswählen

Nodeems du dech ageloggst hues, muss du de Formulaire auswählen.

Wählen Sie einen Vorgang aus

allen im Katalog angebotenen Vorgängen aus.



Alles

Steuern

Arbeit

Familie

Ausbildung

CEDIES : Antrag auf eine staatliche Studienbeihilfe für Hochschulstudien

Erstellen

Etapp 3: Ausfüllen an ënnerschreien

Als nächst muss du dann déi gefroten Donnéeën ausfüllen. Wann s du alles aginn hues, muss du deng Demande nach elektronesch ënnerschreien. Dofir brauchst du nees däi LuxTrust-Produit.

Etapp 4: Dokumenter eroplueden

Jee nodeem, wat s du ausgefëllt hues, gëss du méi oder manner Dokumenter gefrot. Wichteg ass:

- Et ginn nëmme PDF-Dokumente ugeholl. Pass also op, dass du d'Dokumente als PDF scanns
- De PDF dierf net schreifgeschützt sinn. Falls et awer de Fall ass, muss du en einfach just nei ofspäicheren (bei Mac: mat „Vorschau“ opmaachen, dann > „Ablage“ > „sichern“)
- Wann ee vun dengem Dokumenter méi wéi eng Säit huet, muss du déi verschidde Säiten all zesummen an ee PDF-Fichier setzen. Wann s du dann alles eropgelueden hues, muss du nëmmen nach op „Transmettre“ klicken

DEADLINE

Wantersemester:

1. August bis den 30. November

Summersemester:

1. Januar bis den 30. Abrëll

Wichteg!

All Dossier, deen net komplett ass, gëtt eréischt ganz zum Schluss traitéiert!

Däin Dossier muss virun den uewegenannten Deadlinen eragereecht ginn, och wann nach Dokumenter an dengem Dossier feelen an deen onvollstänneg ass. Wann s du en onvollstännegen Dossier virun der Deadline eragereecht hues, hues du d'Méiglechkeet, spéider déi Dokumenter nozerechen, déi gefeelt hunn. Wann s du am Fall bass, wou s du weess, dass du Dokumenter muss nozerechen, solls du dech onbedéngt am Viraus beim Cedies mellen.

E vollstännegen oder onvollstännegen Dossier, deen eréischt no der uewegenannter Deadline beim Cedies eragereecht gëtt, gëtt net méi consideréiert an et verléiert een esou säin Urecht op d'Bourse fir dat Semester.

Fro deng Bourse och am beschten den éischte Mount schonn un, well do sinn d'Waardezäiten net esou laang ewéi kuerz virun der Deadline.



WAT ASS ...?!

Sozialversicherungsnummer/

Matricule:

Hei gëtt déi nei Matricule (13 Stellen) gefrot. Dës fënns du op der Sécurité-sociales-Kaart, déi s du zougeschéckt krus.

Cycle:

E Cycle ass e Studiegang. De Bachelor ass deen éischte Cycle an de Master ass deen zweeten.

RIB:

De „Relevé d'identité bancaire“ (RIB) ass eng Beschäinegung, déi vun der Bank ausgestallt gëtt, a bestätegt, dass e Kont op e bestëmmten Numm leeft (méi dozou ënner „Online-Dokumenter“).

Mobilitätsstipendium/

Bourse de mobilité:

Wann s du kee Kontrakt hues, well s du z. B. an enger WG wunns, geet eng schrëftlech Bestätegung vum Hauptlocataire oder Propriétaire duer.

Familienstipendium/

Bourse familiale:

Dësen Deel vu 500 Euro/Joer gëtt nëmme bei der zweeter Tranche (Summersemester) vun der Bourse ausbezuelet.

Wann s du keng zweet Tranche ufrees, kanns du d'Familljebourse mat engem extrae Formulaire awer ufroen (Sonstige Stipendien/ Autres bourses financières). Wann s du e Subsid, deen net un e „Mérite“ gebonnen ass, vun der Gemeng kriss, muss du deen hei ugin.

Online-Dokumenter:

Verschieden Dokumenter kriss du online:

Op macommune.lu / vdl.lu

(dat ass net bei all Gemeng de Fall):

- Certificat de composition de ménage
- Certificat de résidence

Bei der Uni

(dat ass net bei all Uni de Fall):

- Frais d'inscription/Certificat d'inscription définitive
- Relevé de notes de l'année précédente

Um Web-Banking :

- RIB / Bankverbindungsnaachweis / Relevé d'identité bancaire

Bei der Spuerkeess:

Um S-net aloggen >„Einstellungen“ >„Konten“ >„Bescheinigung einer Bankverbindung“ >„Kontoauswielten“:

- Preuve de paiement des frais d'inscription
- Preuve de paiement de loyer

Méi Informatioun zu der Bourse fënns du ënner:

<https://cedies.public.lu/fr/obtenir-aide-financiere/bourse-pret.html>



ACEL BOURSE VIDEO

Du wëlls alleguer des Informatiounen nach emol méi einfach erkläert kréien, da kuck dir eise Video zur Bourse un!

<https://acel.lu/2019/10/08/video-aides-financieres/>



WAT MAACHEN ECH, WANN ECH KENG ADRESS MÉI ZU LËTZEBOURG HUNN?

Wann s du d'Cedies-Bourse ufroe wëlls, brauchst du eng Adress zu Lëtzebuerg op där s du ugemellt bass. Wann s du awer zum Beispill aus dem Foyer kënns oder net

méi d'Méiglechkeet hues, bei dengem Elteren ze wunnen, kanns du dech an der Maison Eisenborn vum Service National de la Jeunesse (SNJ) umellen. Esou behäls du eng Residenz zu Lëtzebuerg, wat dir erméiglecht, d'Bourse beim Cedies unzefroen.

Hei hues du och d'Méiglechkeet, während de Weekender oder an de Vakanzen een Zëmmer ze kréien. Zu deenen Zëmmeren zielen eng Gemeinschaftskichen, en Openthaltsraum an e Gemeinschaftsbuedzëmmer. De Loyer ass relativ gönschteg an erlaabt et engem, seng Wunneng am Ausland weiderzebezuelen. Du kanns ausserdeem och just e Raum kréien, fir deng perséinlech Saachen ënnerzestellen.

Déi eenzeg Kritären, déi een als Student muss erfëllen, fir seng Demande beim SNJ kënnen ze maachen ass, dass ee muss am Ausland studéieren, dass ee keng Adress zu Lëtzebuerg däerf hunn an dass ee wëlles huet, e Lien zu sengem Ëmfeld zu Lëtzebuerg oprecht ze erhalen.

Wann s du an esou engem Fall bass oder eng Persoun kenns, fir déi d'Maison Eisenborn eng Hëllef kéint sinn, da mell dech iwwer folgend Adress: marie.hetto@snj.lu.

BRAUCH ECH ENG KRANKEVERSÉCHERUNG AM AUSLAND?

ZU LËTZEBUERG AFFILIÉIERT

Wann s du zu Lëtzebuerg wunns an op enger Uni am Ausland ageschriwwen bass, muss du bei enger lëtzebuergescher Krankekeess ugemellt sinn, fir d'Fraise vun der Gesondheetsversécherung am Studienland an zu Lëtzebuerg rembourséiert ze kréien. Hei hues du d'Méiglechkeet, dech entweder als Co-Versécherter (vun dengem Papp oder denger Mamm) unzemellen oder dech perséinlech unzemellen, falls eng Co-Versécherung net méiglech ass.

- Am Fall vun der Co-Versécherung ass déi zoustänneg Keess déi vum Hauptversécherter (dat heescht vun der Mamm oder dem Papp):

- „Caisse nationale de santé“ (CNS) fir Versécherter aus dem Privatsecteur

- „Caisse de maladie des fonctionnaires et employés publics“ (CMFEP) fir Mataarbechter aus dem öffentliche Secteur

- „Caisse de maladie des fonctionnaires et employés communaux“ (CMFEC) fir Gemengemataarbechter

- „Entraide médicale des CFL pour les salariés des chemins de fer luxembourgeois“ fir Mataarbechter vun der Lëtzebuurger Eisebunn

Du kanns dech direkt bei der zoustänneger Krankekeess als Co-Versécherter umellen.

• Wann s du dech als Student perséinlech verséchere wëlls, ass d'Caisse nationale de santé - D'Gesondheetskeess (CNS) zoustänneg. Fir dech unzemellen, muss du de Centre commun de la sécurité sociale (CCSS) kontaktéieren.

GESONDHEITSVERSUERUNG AM STUDIELAND

Am Ausland studéiere gëllt als en temporairen Openthalt am Ausland. Et ka sinn, dass du während dengem Studium medezinesch versuergt muss ginn. Dofir ass et am beschten, déi zoustänneg Sozialversécherung op der Studieplaz ze kontaktéieren, fir méi Informatiounen iwwert d'Konditiounen vum Remboursement an d'Ofdeckung vun der Betreierung op der Plaz ze kréien. Jee nodeem, wou ee studéiert ass d'Situatioun anescht.

Fir d'Länner vun der Europäescher Unión (EU) an dem Europäesche Wirtschaftsraum (EWR), an d'Schwäiz:

Als Student kanns du dech bei der zoustänneger Sozialversécherung vun dengem Studieland registréiere loosse. Dës Aschreiwung erliichtert d'Formalitéiten vum Remboursement, ass awer net onbedéngt noutwendeg. Normalerweis geet et nämlech duer, wann ee seng europäesch Sozialversécherungskart („carte européenne d'assurance maladie“) virweise kann, fir dass d'Fraisen

iwwerholl ginn. Dës Betreierung gëtt dann no de gesetzleche Bestëmmungen vum Land, an deem s du dech ophäls, ausgeféiert an no den Tariffer, déi do applizéiert goufen, rembourséiert.

Déi europäesch Sozialversécherungskart bestätegt d'Recht vum Student op medezinesch Versuergung am Studieland, fir datt e säin Openthalt a séchere medezinesche Konditiounen weiderféiere kann, ouni seng Behandlung a sengem eegene Land ze ënnerbriechen.

Dës Kart kann awer nëmme bei konventionéierten Dénegschtleeschter benotzt ginn, dat heescht bei all Dénegschtleeschter, dee mat der Sozialversécherung vu sengem Land en Ofkommen ënnerschriwwen huet. Normalerweis kann déi europäesch Sozialversécherungskart net vun engem autoriséierten Dénegschtleeschter refuséiert ginn. Wann et sech ëm en net autoriséierten oder privaten Dénegschtleeschter handelt, kënnen d'Behandlungsfraisen no de lëtzebuergesche Bedéngungen an Tariffer rembourséiert ginn.

Wann en Dénegschtleeschter déi europäesch Sozialversécherungskart net akzeptéiert oder s du deng Kart net dobäi hues, muss du d'Käschte vun der medezinescher Versuergung an enger éischter Phas selwer bezuelen a dann e Remboursement bei der

EU: Belsch, Bulgarien, Däitschland, Dänemark, Éisträich, Estland, Finnland, Frankräich, Griichenland, Holland, Irland, Italien, Kroatien, Lettland, Lëtzebuerg, Litauen, Malta, Polen, Portugal, Rumänien, Schweden, Slowakei, Slowenien, Spuenien, Tschechesch Republik, Ungarn, Vereenegt Kinnekräich Groussbritannien an Zypern.

EWR: Island, Liechtenstein an Norwegen

Krankekeess am Openthaltsland oder bei denger lëtzebuergescher Krankekeess ufroen:

- Wann s du d'Rechnungen an d'Krankekeess am Openthaltsland ageschéckt oder se bei hir age-reecht hues, gëss du no den Tariffer an den Tauxen, déi am Openthaltsland gëllen, rembourséiert.

- Wann s du d'Rechnunge bei der zoustänneger Krankekeess zu Lëtzebuerg ageschéckt oder hir se age-reecht hues, rechent dës de Präis vun de Rechnunge bei der Keess vum Openthaltsland (mam Formulaire E126 / S067). Du gëss dann no den Tariffer vum Studieland rembourséiert. Op ausdrécklecher Ufro hues du awer hei och d'Méiglechkeet, fir no de lëtzebuergeschen Tariffer an Tauxe rembourséiert ze ginn.

Ier een an ee vun dëse Länner studéiere geet, ass et wichteg, ze kontrolléieren, ob déi europäesch Sozialversécherungskart nach ëmmer gëltig ass. Wann néideg, kann een e Certificat als provisoereschen Ersatz vun der Sozialversécherungskart bei der zoustänneger Krankekeess ufroen.

Schlussendlech gëtt all net remboursabel Déngschtleschtung (zum Beispill Orthodontie fir Erwuesener, Osteopathie, Heilpraktiker) aus engem vun de genannte Länner net rembourséiert.

Fir vum Remboursement vu bestëmmte Behandlungen wéi Physiotherapie / Kinesithérapie ze profitéieren, brauch een eng Bescheinigung, déi beseet, dass d'Krankekeess d'Käschten iwwerhëlt. Dës kriss du bei der CNS.

Krankeversécherung a Groussbritannien:

Aktuell gëllen hei nach ëmmer déi selwecht Reegelen, wéi fir all d'Länner, déi an der EU sinn. De Moment ginn et keng nei Informatiounen driwwer, wéi d'Krankeversécherung vun de Lëtzeburger Studenten a Groussbritannien gehandhaabt gëtt, wann de Brexit endgültig duerchgefëhrt gouf.

Mir wäerten dech doriwwer op eiser Internetsite www.acel.lu um neiste Stand halen, wa bis Ännerungen kommen.



Fir d'Länner ausserhalb vun der Europäescher Unioun (EU), dem EWR an der Schwäiz, déi duerch eng bilateral Konventioun mat Lëtzebuerg gebonne sinn:

Hei handelt et sech ëm folgend Länner:

Land	Formular
Bosnien an Herzegowina	LU/BiH111
Cap Vert	LCV/5 (5-40)
Mazedonien	Europäesch Sozialversécherungskkaart
Marokko	L/M8
Montenegro	Europäesch Sozialversécherungskkaart
Quebec	LUX QUE 4
Serbien	Europäesch Sozialversécherungskkaart
Tunesien	T/L
Tierkei	TR/L-3

Wann s du an engem vun dëse Länner studéiers, muss du e Formular bei der Sozialversécherung vun dengem Studieland ofginn, dat bestätegt, dass du d'Recht op medezinesch Déngschtleschtunge während dengem Openhalt hues. Du gëss dann ageschriwwen a fäls ënnert déi selwecht Bedéngunge wéi d'Awunner. Den entspreechende Formular muss op d'mannst 15 Deeg virum Depart an d'Land bestallt ginn.

Du kanns deng Rechnungen direkt op der Plaz bei der zoustänneger

Institutioun ofginn, déi dann déi medezinesch Käschten no den Tauxen an Tariffer, déi do gëllen, bezilt. Du kanns awer och d'Rechnungen an déi zoustänneg lëtzebuergescher Krankekeess aschécken, fir no de lëtzebuergesche Bedéngungen, Tauxen an Tariffer rembourséiert ze ginn.

Mir roden dir, dech bei der zoustänneger Institutioun vum Studieland iwwer d'Konditiounen vun der Fleeg a vum Remboursement ze informéieren.

Déngschtleschter vum Privatsektor akzeptéieren d'Formularer, déi hei uewendriwwer opgezielt ginn, net. Hei mussen d'Rechnunge bezuelt ginn an de Remboursement ka just bei der zoustänneger lëtzebuergescher Krankekeess ugefrot ginn.

Fir d'Länner ausserhalb vun der Europäescher Unioun (EU), der EWG an der Schwäiz, déi net duerch eng bilateral Konventioun mat Lëtzebuerg gebonne sinn:

Et handelt sech hei ëm all aner Länner op der Welt, ausserhalb vun der EU, der EWG an der Schwäiz, déi net mat Lëtzebuerg duerch eng Konventioun verbonne sinn, sou wéi d'USA oder Australien.

D'Rechnungen aus dëse Länner mussen un déi zoustänneg lëtzebuergesch Krankekeess geschéckt ginn a ginn dann no de lëtzebuergeschen Tauxen an Tariffer rembourséiert, ënner der Bedéngung, dass dës Tariffer d'Fraisdecken.

Fir datt d'Rechnunge kënne rembourséiert ginn, muss se:

- Bezuelte sinn
- Detailléiert (a medezineschen an net codéierten Ausdréck) sinn an
- An enger vun de folgende Sproochen ausgestallt sinn: Englesch, Franséisch oder Däitsch

D'Käschte fir medezinesch Servicer a Spidoldéngschtleschtunge kënne vun engem Land an dat anert ganz ënnerschiddlech sinn a souguer däitlech méi héich ausfale wéi zu Lëtzebuerg. Et kann also en Ënnerscheed ginn tëscht den tatsächleche Käschten an dem Remboursement vun der CNS - dëst zu Nodeel vun de Versécherten. Wann ee sech an engem vun dese Länner ophält, ass et dofir vu Virdeel, sech zousätzlech ze versécheren.

Natierlech ass et och hei vu Virdeel, sech och op der Plaz selwer bei de Sozialversécherungsorganisationen iwwer de Fonctionnement vum Gesondheetssystem oder d'Fleegekäschten ze informéieren.

Weider Informatiounen fënns du ënnert folgendem Link:

<https://cns.public.lu/de/assure/vie-privee/etudiant.html>



Folgend Informatiounen bezieen sech op eng Affiliatioun bei der CMCM:

D'Studéieren am Ausland gëtt bei der CMCM als temporären Openthalt ugesinn. D'CMCM-Assistance, déi schonn am Basispackage mat abegraff ass, garantéiert de Studenten eng Ofdeckung bis zu 100.000 Euro fir e Spidolsopenthalt. Sollt eng Hospitalisatioun néideg sinn, da si sie ronderëm d'Auer ënnert der Nummer +352 44 44 44 ze erreechen a leeën en Dossier fir de weidere Suivi un. De Partner „Inter Mutuelles Assistance“ (IMA) vun der CMCM kontaktéiert d'Spidol a verséichert em déi total Prise en charge, ouni datt de Student eng Rechnung am Viraus bezuele muss. Esou ginn och no enger Behandlung laang Remboursementszäiten evitéiert

D'Ambulanzkäschten, eng Rettung mam Helikopter oder souguer e Rapatriement zeréck op Lëtzebuerg si bei der CMCM ouni Limit mat garantéiert.

D'Studenten, déi während hirem Schouljoer am Ausland ambulant mussen behandelt ginn (Hausdokter, Spezialist, Röntgen, Kiné, etc.), kënnen der CMCM fir e Remboursement eng Kopie vun der bezuelter Rechnung mat der Ofrechnung vun der Gesondheetskeess eraschécken. Fir dem Student onnéideg administrativ Demarchen ze erspueren, kënnen dës Dokumenter och ganz bequem an direkt aus dem Ausland via d'CMCM-App eragereecht ginn. D'Bedeedegung un de Fraisen, déi de Student doduerch huet missen droen, gi vun der CMCM bis zu engem Plaffong vun 1.250 Euro pro Joer iwwerholl.



» Weider Informatiounen:

Hues du net dat fonnt wat's du gesicht hues?

Kee Problem! Schreif eis einfach eng Mail a mir kucken dir sou séier wéi méiglech op deng Fro ze äntweren oder dech un déi richteg Persoun weider ze leeden.

www.acel.lu // contact@acel.lu //  ACEL-De Studentevertrieder

 ACEL-De Studentevertrieder //  @acelluxembourg

Seuls les textes légaux font foi (Mémorial A, Code du Travail). Les informations contenues dans la présente publication ne préjudicient en aucun cas à une interprétation et application des textes légaux par les administrations étatiques ou les juridictions compétentes.

Le plus grand soin a été apporté à la rédaction de cette brochure. L'éditeur ou l'auteur ne peuvent être tenus responsables d'éventuelles omissions ou erreurs dans le présent ouvrage ou de toute conséquence découlant de l'utilisation des informations contenues dans la présente publication.

JE N'ÉTUDIE PAS UNIQUEMENT MON LOOK



Avec **Axxess Study**, vous profitez de cartes de crédit, d'une carte de débit Axxess valable partout en Europe, de solutions de financement pour vos études et de multiples autres avantages. Pour garder votre look et faire de votre parcours une réussite. Pour les jeunes de **18 à 30 ans** : conditions et infos sur **axxess.lu**



SPUERKEESS.LU